



列傳第六十三

北史二十五

古弼

張黎

劉潔

丘堆

娥清

伊蔽

乙瓌

周幾

萬曆二十年刊
七
史
列
傳
卷
六
十
三

豆代田

車伊洛

王洛兒

車路頭

盧魯元

陳建

來大千

宿石

萬安國

北史二十五

周觀

尉撥

陸真

呂洛拔

薛彪子

子敏

尉元

慕容白曜

和其奴

苟頽

宇文福

古弼代人也少忠謹善騎射初為獵郎門下奏事以敏正稱明元嘉其真而有用賜名曰筆後改名弼言其有輔佐才也令典西部與劉潔等分縮機要敷奏百揆太武即位以功拜立節將軍賜爵靈壽侯歷位侍中吏部尚書典南部奏事後征馮弘弘將奔高麗高麗救軍至弘乃隨之令婦人被甲居中其精卒及高麗陳兵於外弼部將高荀子擊賊軍弼酒醉拔刀止之故弘

得東奔太武大怒黜為廣夏門卒尋復為侍中與尚書李順使涼州賜爵建興公鎮長安甚有威名及議征涼州弼與順咸言涼州乏水草不宜行帝不從既剋姑臧微嫌之以其有將略弗之責宋將裴方明剋仇池立楊玄庶子保熾於是假弼節督隴右諸軍討仇池平之未幾諸氏復推楊文德為主圍仇池弼攻解其圍文德走漢川時東道將皮豹子聞仇池圍解議欲還軍弼使謂曰若其班師寇衆復至後舉為難不出

北齊書卷之三
三
秋冬南寇必來以逸待勞百勝之策也豹子乃
止太武聞之曰弼言長策也制有南秦弼謀多
矣景穆總攝萬機徵為東宮四輔與宜都王穆
壽並參政事遷尚書令弼雖事務殷湊而讀書
不輟端謹慎密口不言禁中事功名等於張黎
而廉不及也上谷人上書言苑囿過度人無田
業宜減太半以賜貧者弼入欲陳奏遇帝與給
事中劉樹碁志不聽事弼侍坐良久不獲申聞
乃起於帝前捽樹頭掣下牀以手搏其耳以拳

毆其背曰朝廷不理實爾之罪帝失容放碁曰
不聽奏事過在朕樹何罪置之弼具狀以聞帝
竒弼公直皆可其奏以與百姓弼曰為臣逞志
於君前者非無罪也乃詣公車免冠徒跣自劾
請罪帝召之謂曰卿其冠履吾聞築社之役蹇
蹇而築之端冕而事之神與之福然則卿有何
罪自今以後苟利社稷益國便人者雖復顛沛
造次卿則為之無所顧也太武大閱將校獵於
河西弼留守詔以肥馬給騎人弼命給弱者太

武大怒曰尖頭奴敢裁量朕也朕還臺先斬此
奴弼頭尖帝常名之曰筆頭時人呼爲筆公屬
官懼誅弼告之曰吾謂事君使田獵不過盤游
其罪小也不備不虞使我寇恣逸其罪大也今
北狄孔熾南虜未滅狡焉之志窺伺邊境是吾
憂也故選肥馬備軍實爲不虞之遠慮苟使國
家有利吾寧避死乎明主可以理干此自吾罪
帝聞而歎曰有臣如此國之寶也賜衣一襲馬
二疋鹿十頭後車駕田於山北獲麋鹿數千頭

詔尚書發車牛五十乘運之帝尋謂從者曰筆
公必不與我汝輩不如馬運之速遂還行百餘
里而弼表至曰今秋穀懸黃麻菽布野豬鹿竊
食鳥鴈侵費風波所耗朝夕參倍乞賜矜緩使
得收載帝謂左右曰筆公果如朕卜可謂社稷
之臣初楊難當之來也詔弼悉送其子弟於京
師楊玄少子文德以黃金三十斤賂弼弼受金
留文德而遇之無禮文德亡入宋太武以其正
直有戰功弗加罪責太武崩吳王立以弼爲司

徒文成即位與張黎並坐議不合旨俱免有怨
謗之言其家人告巫蠱俱伏法時人寃之其五
張黎鴈門平原人也善書計道武知待之明元
器其忠亮賜爵廣平公管綜機要太武以其功
舊任以輔弼除大司農卿軍國大議黎常與焉
以征赫連定功進號征北大將軍與樂安王範
濟南公崔徽鎮長安清約公平甚著聲稱代下
之日家無餘財太武征涼州蠕蠕吳提乘虛入
寇黎與司空長孫道生拒擊走之景穆初總百

揆黎與崔浩等輔政忠於奉上非公事不言詔
賜浩黎布帛各千疋以褒舊勲吳王余立以黎
為太尉後文成即位與古弼俱誅黎不平却
劉潔長樂信都人也昭成時慕容氏獻女潔祖
父生為公主家臣乃隨入魏賜以妻妾生子提
位樂陵太守封信都男卒潔襲提爵數從征討
進爵會稽公後與永安侯魏勤及功勞將軍元
屈等擊吐京叛胡為其所執送赫連屈丐潔聲
氣不撓呼其字而與之言神色自若屈丐壯而

釋之後得還國典東部事明元寢疾太武監國
潔與古弼等選侍東宮對綜機要太武即位竒
其有柱石用委以大任及議軍國朝臣咸推其
能遷尚書令改為鉅鹿公車駕西伐潔為前鋒
沮渠牧犍弟董來距戰於城南潔信卜者之言
以日辰不協擊鼓却陣故董來得入城太武微
嫌之潔久在樞密恃寵自尊帝心稍不平時議
伐蠕蠕潔言不如廣農積穀以待其來羣臣皆
從其議帝決行乃從崔浩議既出與諸將期會

鹿渾谷而潔恨其計不用欲沮諸將乃矯詔更
期諸將不至時虜衆大亂景穆欲擊之潔執不
可停鹿渾谷六日諸將猶不集賊已遠遁追至
石水不及而還師次漢中糧盡士卒多死潔陰
使人驚軍勸帝棄軍輕還帝不從潔以軍行無
功奏歸罪於崔浩帝曰諸將後期及賊不擊罪
在諸將豈在於浩又潔矯事遂發輿駕至五原
收潔幽之太武之征也潔私謂親人曰若軍出
無功車駕不返即吾當立樂平王潔又使右丞

張嵩求圖識問劉氏應王繼國家後我審有名
姓不嵩對曰有姓而無名窮驗款引搜嵩家果
得讖書潔與南康公秋隣及嵩等皆夷三族死
者百餘人潔既居勢要內外憚之側目而視籍
其家財產鉅萬太武追忿言則切齒
丘堆代人也美容儀初以忠謹入侍明元即位
拾遺左右稍遷散騎常侍太武監國臨朝堆與
太尉穆觀等為右弼及即位賜爵臨淮公位太
僕與宗正娥清略地關右而宜城王奚斤表留

堆合軍與赫連昌相拒斤進擊赫連定留堆守
輜重斤為定禽堆聞而棄甲走長安帝大怒遣
西平公安頡斬堆

娥清代人也少有將略累著戰功稍遷給事黃
門侍郎明元南巡幸鄴以清為中領軍將軍與
宋兵將軍周幾等度河略地至湖陸以功賜爵
須昌侯與幾等遂鎮枋頭太武初乃還京師進
為東平公後從平統萬遂與奚斤討赫連昌至
安定及昌弟定西走斤追之清欲尋水往斤不

從遂與斤俱為定禽剋平涼乃得還後與古弼等東討馮弘以不急戰弘奔高麗檻車徵黜為門卒而卒於家子延賜爵南平公以還京朝伊馱代人也少勇健走及奔馬善射力曳牛却行神虜初擢為侍郎轉三郎賜爵汾陽子太武將討涼州議者咸以無水草諫唯司徒崔浩勸行羣臣出後馱曰涼州若無水草何得為國宜從浩言帝善之及剋涼州大會於姑臧帝謂羣臣曰崔公智計有餘吾亦不復奇之正奇馱弓

馬士所見能與崔同耳顧謂浩曰馱智力如此終至公相浩曰何必讀書然後為學衛青霍去病亦不讀書而致公輔帝欲以馱為尚書封郡公馱以尚書務殷公爵至重辭之中祕二省多諸文士請參其次帝賢之遂拜祕書監賜爵河南公拜司空清約自守為政舉大綱而已不為苛碎大安二年領太子太保三年與司徒陸麗等並平尚書事薨子蘭襲爵位庫部尚書卒子盆生驍勇有膽氣累有戰功遂為名將以勲賜

爵平城子為西道都督戰歿贈雍州刺史
乙瓌代人也其先世統部落太武時瓌父匹知
遣瓌入貢帝留之瓌善騎射手格猛獸尚太武
女上谷公主除駙馬都尉賜爵西平公從駕南
征都督前鋒諸軍事勇冠三軍後進爵為王又
為西道都將薨年二十九贈太尉公謚曰恭子
乾歸襲爵乾歸有氣幹頗習書疏尤好兵法尚
景穆女安樂公主除駙馬都尉侍中獻文初為
秦州刺史有惠政孝文即位為中道都將卒謚

曰康子海字懷仁位散騎侍郎卒謚曰孝海子
瑗字雅珍尚孝文女淮陽公主除駙馬都尉累
遷西兗州刺史天平元年舉兵應樊子鵠戰敗
死

周幾代人也少以善射為獵郎明元即位為左
部尚書以軍功封交趾侯太武以幾有智勇遣
鎮河南威信著于外境幾常嫌奚斤等綏撫關
中失和每至言論形於聲色斤等憚焉進號宋
兵將軍率洛州刺史于栗磾以萬人襲陝城卒

于軍軍人無不歎惜之歸葬京師謚曰桓子步襲爵

豆代田代人也明元時以善騎射為內細射從攻武牢詔代田登樓射賊矢不虛發以功遷內三郎從討赫連昌乘勝追賊入其宮門門閉代田踰宮而出太武壯之拜勇武將軍後從討平涼破赫連定得奚斤等以定妻賜之詔斤膝行授酒於代田敕斤曰全尔身命者代田功也以從討和龍戰功封長廣公卒於統萬鎮大將贈

長廣王謚曰恭子周求襲爵

車伊洛焉耆胡也世為東境部落帥恒脩職貢延和中授平西將軍封前部王伊洛規欲歸闕為沮渠無諱斷路伊洛連戰破之無諱卒伊洛前後遣使招喻其子乾壽等及其戶五百餘家送之京師又率部眾二千餘人伐高昌討破焉耆東關七城正平二年伊洛朝京師拜都官尚書將軍王如故卒謚康王葬禮依盧魯元故事子歇襲爵

王洛兒京兆人也。明元在東宮，以善騎射給事帳下，謹愿未嘗有過。明元嘗獵于灑南，冰陷沒馬，洛兒投水奉帝出，殆將凍死，帝解衣賜之，自是恩寵日隆。天賜末，帝避難居外，洛兒晨夜侍衛，恭勤發於至誠。元紹之逆，帝左右唯洛兒與車路頭。晝居山嶺，夜還洛兒家。洛兒隣人李道潛相奉給，晨復還山，衆庶頗知喜而相告。紹聞收道斬之。洛兒猶冒難往返京都，通問於大臣。大臣遂出奉迎，百姓奔赴。明元還宮，社稷獲全。

洛兒有功焉。明元即位，拜散騎常侍，賜爵新息公，加直意將軍。又追贈其父為列侯，賜僮隸五千戶，卒贈太尉。建平王賜溫明祕器，載以輜輶，車使殿中衛士為之導從，親臨哀慟者四馬，乃鳩其妻周氏與合葬。子長城襲爵。車路頭代人也，少以忠厚選給東宮，為帳下。天賜末，明元出於外，路頭隨侍竭力。及即位，封宣城公，忠意將軍。帝性明察，羣臣多以職事遇譴，至有杖罰。故路頭優游不任事，性無害，每評

獄處理常獻寬恕之議以此見重於朝帝亦敬納之卒明元親臨哀慟贈太保宣城王謚曰忠貞喪禮一依安城王叔孫俊故事陪葬金陵子眷襲爵外人也忠貞與合東宮為勳下朝盧魯元昌黎徒河人也曾祖副鳩仕慕容氏為尚書令臨澤公祖父竝至大官魯元寬和有雅度明元時選為通直郎以忠謹給侍東宮太武親愛之即位以為中書侍郎寵待彌渥而魯元益加謹肅帝愈親待之內外大臣莫不敬憚性

多容納善與人交好掩人過揚人美由是公卿咸親附之以工書有文才累遷中書監領祕書事賜爵襄城公贈其父為信都侯從征赫連昌太武親追擊入其城門魯元隨帝出入是日微魯元幾至危殆後遷太保錄尚書事帝貴異之臨幸其第不出旬日欲其居近易往來乃賜甲第於宮門南衣食車馬皆乘輿之副真君三年駕幸陰山魯元以疾不從侍臣問疾醫藥傳驛相屬於路及薨帝甚悼惜之還臨其喪哭之哀

勸東西二宮命大官日送奠晨昏哭臨訖則備
奏鍾鼓伎樂輿駕比葬三臨之喪禮依安城王
叔孫俊故事而賙送有加贈襄城王謚曰孝葬
於崞山為建碑闕自魏興貴臣恩寵無與為比
子統襲爵以父任侍東宮太武以元舅陽平王
杜超女南安長公主所生妻之車駕親自臨送
太官設供具賞賚千計文成即位典選部主客
二曹卒贈襄城王謚曰景無子弟彌娥襲卒贈
襄城王謚曰恭魯元少子內給侍東宮景穆深

昵之常與臥起同衣食父子有寵兩宮勢傾天
下內性寬厚有父風而恭慎不及正平初宮臣
伏誅太武以魯元故唯殺內而厚撫其兄弟
陳建代人也以善騎射擢為三郎遷下大夫內
行長太武討山胡白龍輕之單將騎數十每自
登山白龍伏壯士出不意帝墜馬幾至不測建
以身捍賊奮擊殺數人被十餘瘡帝壯之賜別
戶二十文成初出為幽州刺史假秦郡公帝以
建貪暴懦弱遣使就州罰杖五十孝文初徵為

尚書右僕射加侍中進爵趙郡公建與晉陽侯元仙德長樂王穆亮平原王陸叡密表啓南伐帝嘉之遷司徒進爵魏郡王帝與文明太后頻幸建第賜建妻於後庭薨子念生襲有罪除爵來大千代人也父初真從道武避難叱候山參翔業功官至後將軍武原侯與在八議大千驍果善騎射永興初襲爵位中散至於朝賀之日大千常著御鎧盤馬殿庭朝臣莫不嗟歎遷內三郎幢將典宿衛禁旅大千用法嚴明上下齊

肅嘗從明元校獵見獸在高巖上持稍直前刺之應手而死帝嘉其勇壯太武踐阼與襄城公盧魯元等七人俱為常侍常持仗侍衛晝夜不離左右累從征伐以戰功賜爵廬陵公鎮雲中兼統白道軍事太武以其壯勇數有戰功兼悉北境險要詔使巡撫六鎮以防寇虜經略布置甚得事宜後吐京胡反以大千為都將討平之在吐京卒喪還停於平城南太武出游還見而問之左右以對帝悼歎者良久詔聽其喪入殯

城內贈司空謚莊公子丘頽襲爵降為晉興侯
宿石朔方人赫連屈苒弟文陳之曾孫也天興
中文陳父子歸魏道武嘉之以宗女妻焉拜上
將軍祖若豆根明元時賜姓宿氏襲上將軍父
沓于從太武征平涼有功賜爵漢安男後從討
蠕蠕戰沒石年十三襲爵擢為中散遷內行令
從於苑中游獵石走馬引前道峻馬倒殞絕久
之乃蘇由是御馬得制文成嘉之賜以綿帛駿
馬改爵義陽子又常從獵文成親欲射猛獸石

叩馬諫引帝至高原上後猛獸騰躍殺人褒美
其忠許後有犯罪宥而勿坐賜駿馬一疋尚上
谷公主拜駙馬都尉位吏部尚書進爵太山公
為北征中道都大將卒追贈太原王謚康葬禮
依盧魯元故事太和初子倪襲爵

萬安國代人也世為酋帥父振尚高陽長公主
拜駙馬都尉位長安鎮將爵馮翊公安國少明
敏以國甥復尚河南公主拜駙馬都尉獻文特
親寵之與同臥起拜大司馬大將軍封安城王

安國先與神部長奚買奴不平。承明初矯詔殺買奴於苑中。孝文聞之大怒，遂賜死。年二十三。子翼襲王爵，有嵇根者，世為紇奚部帥。皇始初，率部歸魏。尚昭成女生子拔，位尚書令。拔尚華陰公主生子敬元，紹之逆也。主有功，超授敬太司馬，封長樂王。薨，子護襲拜外都大官。根事迹遺落，故略附云。

周觀，代人也。驍勇有膂力，太武以軍功賜爵金城公，位高平鎮將。善撫士卒，號有威名。後拜內

都大官，出為秦州刺史。撫馭失和，部人薛永宗聚眾汾曲以叛，觀討永宗，為流矢所中。太武幸蒲坂，觀聞帝至，驚怖而起，瘡重遂卒。帝怒，絕其爵云。
尉撥，代人也。父郝，濮陽太守。撥為太學生，募從兗州刺史羅忸擊賊於陳汝，有功，賜爵介休男。討和龍，擊吐谷渾，皆有軍功。進爵為子，累遷杏城鎮將。大得人和，文成以撥清平有惠績，賜以衣服，獻文即位為北征都將，南攻懸瓠，進爵安

城侯位北豫州刺史卒謚敬侯

陸真代人也父洛侯秦州刺史真少善騎射太武以真膂力過人拜內三郎真君中從討蠕蠕以功賜爵關內侯後攻懸瓠登樓臨射城中弦不虛發從太武至江還次盱眙台真功居多文成即位進爵都昌侯位選部尚書後拜長安鎮將時初置長蛇鎮真率衆築城未訖而氐豪仇偁檀等反叛真擊平之卒城長蛇而還東平王道符反于長安以真為長安鎮將賜爵河南公長

安平兵人素伏其威信及至皆帖然安靜在鎮數年甚著威稱卒謚曰烈子延字契胡提頗有氣幹襲爵河南公例降改封汝陽侯位懷朔鎮大將太僕卿受使綏慰秀容為牧子所害

呂洛拔代人也曾祖渴侯昭成時率戶五千歸魏父匹知太武時為西部長封滎陽公洛拔以壯勇知名文成末為平原鎮都將隨尉元攻宋將張永大敗之賜爵成武侯卒長子文祖獻文以其勲臣子補龍牧曹奏事中散以牧產不滋

坐徙武川鎮後文祖以舊語譯註皇誥辭義通
辯為外都曹奏事中散後坐事伏法文獻通考
薛彪子代人也祖達頭自姚萇時率部落歸魏
道武賜爵聊城侯待以上客禮賜妻鄭氏卒贈
冀州刺史謚曰悼父野睹并太二州刺史封河
東公有聲稱卒謚曰簡彪子姿貌壯偉明斷有
父風為內行長典奏諸曹事當官正直內外憚
之及文明太后臨朝出為枋頭鎮將素剛簡為
近臣所嫉因小過黜為鎮門士及獻文南巡次

山陽彪子拜訴於路復除枋頭鎮將累遷開府
徐州刺史在州甚多惠政百姓便之沛郡太守
邵安下邳太守張攀咸以贓污彪子案之於法
安等遣子弟上書誣彪子南通賊虜孝文曰此
妄矣推案果虛卒謚曰文子琬隋尚書書
琬字曇珍形貌瓌偉少以幹用為典客令每引
見儀望甚美宣武謂曰卿風度峻整姿貌秀異
後當升進何以處官琬荅曰宗廟之禮不敢不
敬朝廷之事不敢不忠自此之外非庸臣所及

正光中行洛陽令部內肅然時以久旱京師見
囚悉召集於都亭理問寃滯洛陽獄唯有三人
孝明嘉之賜縑百疋琬本附元又廢憂懼由
是政教廢弛坐免官李神軌有寵於靈太后琬
復事之累遷吏部郎中先是吏部尚書崔亮奏
立停年格不簡人才專問勞舊琬乃上書曰臣
聞錦穀雖輕不委之以學割瑚璉任重豈寄之
以弱力若使選曹唯取年勞不簡賢否使義均
行鴈次若貫魚勘簿呼名一吏足矣數人而用

何謂銓衡今黎元之命繫於守長若其得人則
蘇息有地任非其器為患更深請郡縣之職吏
部先盡擇才并學通古今曉達政職者以應其
選不拘入職遠近年勲多少其積勞之中有才
堪牧人者自在先用之限其餘不堪者既壯藉
其力豈容老而棄之將佐丞尉去人稍遠小小
當否未為多失宜依次補叙以酬其勞書奏不
報後因引見復陳之曰今四方初定務在養人
臣請依漢氏更立四科令三公宰貴各薦時賢

以補郡縣明立條格防其阿黨之端庶令塗炭之餘戴仰有地詔下公卿議之事亦寢元天穆討邢杲以琬為行臺尚書軍次東郡時元顥已據鄆城邢杲又逼歷下天穆議其所先議者咸以杲盛宜先經略唯琬以杲為聚眾無名雖強猶賊元顥皇室昵親來稱義舉自河陰之役人情駭怨令有際會易生感動待顥事決然後迴師天穆以羣情所願遂先討杲杲降軍還至定陶天穆留琬行西兗州事尋為元顥所陷顥執

琬自隨介朱榮破顥天穆謂琬曰不用君言乃至於此天平初拜七兵尚書齊神武引為丞相府長史軍國之事多所關知琬亦推誠盡節屢進忠讜神武大舉西伐將度蒲津琬諫曰西賊連年饑饉故冒死來入陝州但宜置兵諸道勿與野戰比及來年麥秋人應餓死寶炬黑獺自然歸降願無渡河侯景亦曰今舉兵極大萬不一捷卒難收歛不如分為二軍相繼而進前軍若勝後軍合力前軍若敗後軍承之神武皆弗

納遂有沙苑之敗後范陽盧仲禮反瑒與諸軍
討平之轉殷州刺史為政嚴酷吏人苦之後歷
位度支殿中二尚書天保元年卒於兼尚書右
僕射臨終敕其子斂以時服踰月便葬不聽干
求贈官自制喪車不加彫飾但用麻為旒蘇繩
網絡而已明器等物竝不令置瑒久在省闈明
閑簿領當官剖斷敏速如流然天性險忌情義
不篤外若方格內實浮動受納貨賄曲理舞法
深文刻薄多所傷害人士畏惡之魏東平王元

匡妾張氏淫逸放恣瑒初與姦通後納以為婦
惑其讒言遂棄前妻于氏不認其子允家人內
忿競相告列深為世所譏鄙贈開府儀同三司
尚書左僕射青州刺史謚曰威恭子允嗣
尉元字苟仁代人也世為豪宗父自斤勇略聞
於當時位中山太守元以善射稱為羽林中郎
以匪懈見知稍遷駕部給事中賜爵富城男和
平中遷北部尚書進爵太昌侯天安元年薛安
都以徐州內附獻文以元為持節都督東道諸

軍事與城陽公孔伯恭赴之宋兗州刺史畢衆
敬遣東平太守章仇榭歸款元竝納之遂長驅
而進宋遣將張永沈攸之等屯于下礮安都出
城見元元依朝旨授其徐州刺史遣中書侍郎
高閭李璨等與安都俱還入城別令孔伯恭撫
安內外然後元入彭城元以永仍據險要乃命
安都與璨等同守身率精銳揚兵於外分擊呂
梁絕其糧運永遂捐城夜遁於是遣高閭與張
謹對為東徐州刺史李璨與畢衆敬對為東兗

州刺史拜元開府都督徐州刺史淮陽公太和
初徵為內都大官既而出為使持節鎮西大將
軍開府統萬鎮都將甚得夷人之心三年進爵
淮陽王以舊老見禮聽乘步挽杖於朝齊高帝
既立多遣間諜扇動新人不逞之徒所在蜂起
以元威名夙振使總率諸軍以討之東南清晏
遠近帖然入為侍中都曹尚書遷尚書令進位
司徒十年例降庶姓王爵封山陽郡公其年頻
表以老乞身詔許之元詣闕謝老引見於庭命

升殿勞宴賜玄冠素服又詔曰前司徒山陽郡公尉元前大鴻臚卿新太伯游明根竝元亨利貞明允誠素位顯台宿歸老私第可謂知始知卒希世之賢也公以八十之年宜處三老之重卿以七十之齡可充五更之選於是養三老五更於明堂國老庶老於階下孝文再拜三老親袒割牲執爵而饋於五更行肅拜之禮賜國老庶老衣服有差既而元言曰自天地分判五行施則人之所崇莫重於孝順然五孝六順天下

之所先願陛下重之以化四方臣既年衰不究遠趣心耳所及敢不盡誠帝曰孝順之道天地之經今承三老明言銘之于懷明根言曰夫至孝通靈至順感幽故詩云孝悌之至通于神明光于四海如此則孝順之道無所不格願陛下念之以濟黎庶臣年志朽弊識見昧然在於愚慮不敢不盡帝曰五更助三老以言至範敷展德音當克已復禮以行來授禮畢乃賜步挽一乘詔曰夫尊老尚更列聖同致欽年敬德綿哲

齊軌朕雖道謝玄風識昧獻則然仰稟先誨企
遵猷旨故推老以德立更以元父焉斯彰兄焉
斯顯矣前司徒公元前鴻臚卿明根竝以冲德
懸車懿量歸老故尊老以三事更以五雖老更
非官耄耄罔祿然況事既高宜加殊養三老可
給上公祿五更可食元卿俸供食之味亦同其
例十七年元疾篤帝親省疾薨謚景桓公葬以
殊禮給羽葆鼓吹假黃鉞班劍四十人子翊襲
爵遷洛以山陽在畿內改為博陵郡公卒於恒

州刺史謚曰順

慕容白曜慕容晃之玄孫也父瑀歷官以廉清
著稱賜爵高都侯終尚書左丞謚曰簡白曜少
為中書吏以敦直給事宮中襲爵稍遷北部尚
書文成崩與乙渾共執朝政遷尚書右僕射進
爵南鄉公宋徐州刺史薛安都兗州刺史畢眾
敬竝以城內附詔鎮南大將軍尉元鎮東將軍
孔伯恭赴之而宋東平太守申纂屯無鹽并州
刺史房崇吉屯斗城遏絕王使皇興初加白曜

使持節督諸軍事征南大將軍進爵上黨公屯
碣礪為諸軍後繼白曜攻纂於無鹽拔其東郭
纂遁遣兵追執之迴攻斗城肥城戍主聞軍至
棄城遁走獲粟三十萬石又下襲破麋溝垣苗
二戍得粟十餘萬斛由是軍糧充足先是淮陽
公皮豹子再征垣苗不剋白曜一旬內頻拔四
城威震齊土獻文下詔褒美之斗城不降白曜
縱兵陵城殺數百人崇吉夜遁白曜撫其人百
姓懷之獲崇吉母妻待之以禮宋遣將吳喜公

欲寇彭城鎮南大將軍尉元請濟師獻文詔白
曜赴之白曜到瑕丘遇患因停會崇吉與從弟
法壽盜宋盤陽城以贖母妻白曜遣將軍長孫
觀等率騎入自馬耳關赴之觀至盤陽諸縣悉
降白曜自瑕丘進攻歷城二年崔道固及兗州
刺史梁鄒守將劉休賓竝面縛而降白曜皆釋
之送道固休賓及其寮屬于京師後乃徙二城
人望於下館朝廷置平齊郡懷寧歸安二縣以
居之自餘悉為奴婢分賜百官白曜雖在軍旅

而接待人物寬和有禮所獲崇吉母妻申纂婦
女皆別營安置不令士卒喧雜及進克東陽擒
沈文秀凡獲倉粟八十五萬斛始末三年築圍
攻擊雖士卒死傷無多怨叛三齊欣然安堵樂
業剋城之日以沈文秀抗倨不為之拜忿而搃
撻唯以此見譏以功拜開府儀同三司都督青
州刺史進爵濟南王初乙渾專權白曜頗所挾
附後緣此追以為責四年見誅云謀反叛時論
寃之白曜少子真安年十一聞父被執將自殺

家人止之曰輕重未可知真安曰王位高功重
若小罪終不至此我不忍見父之死遂自縊太
和中著作佐郎成淹上表理白曜孝文覽表嘉
愍之白曜弟子契輕薄無檢太和初以名家子
擢為中散遷宰官中散南安王楨有貪暴之響
遣中散閭文祖詣長安察之文祖受楨金寶之
賂為楨隱而不言事發太后引見羣臣謂曰前
論貪清皆云剋脩文祖時亦在中後竟犯法以
此言之人心信不可知孝文曰卿等自審不勝

貪心者聽辭位歸第契進曰小人之心無定而帝王之法有常以無恒之心奉有常之法非所剋堪乞垂退免帝曰契若知心不可常即知貪之惡矣何為求退遷宰官令賜爵受爵男後卒於都督朔州刺史謚曰剋初慕容貞會後種族仍繁天賜末頗忌而誅之時有免者不敢復姓皆以興為氏延昌末詔復舊姓而其子女先入掖庭者猶號慕容特多於他族慕容自謚大和其奴代人也少有操行善射御初為三郎文

成初封平昌公累遷尚書左僕射又與河東王閭毗太宰常英等竝平尚書事在官慎法不受私請遷司空加侍中文成崩乙渾與林金閭擅殺尚書楊保年等時殿中尚書元郁率殿中宿衛士欲加兵於渾渾懼歸咎於金閭執以付郁時其奴以金閭罪惡未分出之為定州刺史皇興元年長安鎮將東平王道符反詔其奴討之未至而道符敗軍還薨內外歎惜之贈平昌王謚曰宣子受襲爵宣子父

荀頹代人也本姓若干父洛拔內行長頹厚重寡言少嚴毅清直武力過人擢為中散小心謹敬太武至江賜爵建德男累遷司衛監洛州刺史抑強扶弱山蠻畏威不敢為寇太和中歷位侍中都曹尚書進爵河南公頹方正好直言雖文明太后生殺不允頹亦言至懇切李惠李訢之誅頹竝致諫遷司空進爵河東王以舊老聽乘步挽杖於朝大駕行幸三川頹留守京師沙門法秀謀反頹率禁旅收捕畢獲內外晏然薨

謚僖王長子愷襲爵河東王例降為公

宇文福其先南單于之遠屬也世為擁部大人祖活撥仕慕容垂為唐郡內史遼東公道武之平慕容氏活撥入魏為第一客福少驍果有膂力太和中累遷都牧給事及遷洛敕福檢牧馬所福規石濟以西河內以東拒黃河南北千里為牧地今之馬場是也及徙代移雜畜牧於其所福善於將養竝無損耗孝文嘉之尋補司衛監後以勲封襄樂縣男歷位太僕卿都官尚書

營州大中正瀛州刺史性忠清在公嚴毅以信
御人甚得聲譽後除都督懷朔沃野武川三鎮
諸軍事懷朔鎮將至鎮卒謚曰貞惠子延字慶
壽體貌魁岸眉目踈朗位員外散騎侍郎以父
老詔聽隨侍在瀛州屬大乘祆黨突入州城延
率奴客逆戰身被重瘡賊縱火燒齋閣福時在
內延突火入抱福出外支體灼爛鬚髮盡焦於
是勒衆與賊苦戰賊乃散走以此見稱累遷直
寢與万俟醜奴戰沒

論曰古弼軍謀經國有柱石之量張黎誠謹廉
方以勲舊見重竝織介之間一朝隕覆宥及十
世乃徒言耳劉潔外之徒也丘堆敗以亡身娥
清伊馘俱以材力見用而馘以謀猷取異其殆
優乎乙瓌之驍猛周幾之智勇代田之騎射其
位遇豈徒然也車伊洛宅心自遠豈常戎乎王
洛兒車路頭盧魯元陳建來大于宿石或誠發
于束竭節危難或忠存衛主義足感人苟非志
烈亦何能若此宜其生受恩遇歿盡哀榮至如

安國以至覆亡害盈之義也周觀尉撥陸真呂
洛拔等咸以勇毅自進而觀竟至貶黜異夫數
子者矣薛彪子世載強正曇珍克盛家聲美矣
乎魏之諸將軍方面之績尉元以寬雅之風膺
將帥之任威名遠被位極公老自致乞言之地
無乃近代之一人歟白曜出專薄伐席卷三齊
考績圖勞固不細矣而功名難處追猜嬰戮宥
賢議勤未聞於斯日也和其奴之貞正苟顏之
剛直宇文福之氣幹咸亦有用之士乎

列傳第十四

北史二十六

宋隱

從子愔
并孫欽道

愔孫并
并族弟翻

許彥

五世孫
傳

刁靡

子導

辛紹先

韋閻

孫子榮

杜銓

宋隱字處默西河介休人也曾祖奭祖活父恭

世仕慕容氏位並通顯慕容儁徙鄴恭始家於
廣平列人焉隱性至孝專精好學仕慕容垂位
本州別駕道武平中山拜隱尚書吏部郎積遷
行臺右丞領選以老病乞骸骨不許尋以母喪
歸列人既葬被徵乃棄妻子匿於長樂數年而
卒臨終謂其子經曰汝等苟能入順父兄出悌
鄉黨仕郡幸而至功曹史以忠清奉之足矣不
勞遠詣臺閣恐汝不能富貴徒延門戶累耳若
忘吾言是死若父也使鬼有知吾不歸食矣隱

弟宣字道茂與范陽盧玄勃海高允博陵崔建
從子愔俱被徵拜中書博士後拜侍郎行司徒
校尉卒謚曰簡侯宣子謨字乾仁襲爵卒於遼
西太守子鸞襲爵位東莞太守鸞弟瓊字普賢
以孝稱母曾病季秋月思瓜瓊夢想見之求而
遂獲時人異之卒於家愔歷中書博士員外散
騎常侍使江南爵列人子卒於廣平太守長子
顯襲爵顯無子養弟子弁為後
弁字義和父叔珍娶趙郡李敷妹因敷事而死

弁至京師見尚書李沖因言論移日沖異之退
曰此人一日千里王佐才也顯卒弁襲爵弁與
李彪州里迭相祗好彪為祕書丞請為著作佐
郎遷尚書殿中郎中孝文曾因朝會次歷訪治
道弁年少官微自下而對聲姿清亮進止可觀
帝稱善者久之因是大被知遇賜名為弁意取
弁和獻玉楚王不知寶之義遷中書侍郎兼員
外散騎常侍使齊齊司徒蕭子良祕書丞王融
等皆稱美之以為志氣蹇諤不逮李彪而體韻

和雅舉止閑遠過之轉散騎侍郎時散騎位在
中書之右孝文曾論江左事問弁在南興亡之
數弁以為蕭氏父子無大功於天下既以逆取
不能順守必不能貽厥孫謀保有南海若物憚
其威身免為幸後車駕南征以弁為司徒司馬
東道副將軍人有盜馬而斲者斬而徇於是三軍
震懼莫敢犯法黃門郎崔光薦弁自代帝不許
亦賞光知入亦幾以弁兼司徒左長史時大選
內外羣臣弁定四海士族弁專參銓量之任事

多稱言然好言人之陰短高門大族意所不便者并因毀之至於舊族淪滯而人非可忌者又申達之并又為本州大中正姓族多所降抑頗為時人所怨遷散騎常侍尋遷右衛將軍領黃門并自陳讓帝曰吾為相知者卿亦不可有辭豈得專守一官不助朕為政且常侍者黃門之庶兄領軍者三衛之假攝不足空存推讓以棄大委其被知遇如此孝文北都之選李冲多所參預頗抑宋氏并恨冲而與李彪交結雅相

知重及彪之抗冲冲謂彪曰爾如狗耳為人所嗾及冲劾彪不至入罪并之力也彪除名并大相嗟慨密圖申復孝文在汝南不豫大漸旬餘日不見侍臣左右唯彭城王勰等數人而已小瘳乃引見門下及宗室長幼諸人入者未能皆致悲泣唯并與司徒司馬張海歔歔流涕由是益重之車駕征馬圈留并以本官兼祠部尚書攝七兵事及行執其手曰國之大事在祀與戎故令卿縮攝二曹并頓首辭謝并劬勞王事恩

遇亞於李冲帝每稱弁可為吏部尚書及崩遺
詔以弁為之與咸陽王禧等六人輔政而弁先
卒年三十八贈瀛州刺史謚曰貞順弁性好矜
伐自許膏腴孝武以郭祚晉魏名門從容謂弁
曰卿固當推郭祚之門弁笑曰臣家未肯推祚
帝曰卿自漢魏以來既無高官又無雋秀何得
不推弁曰臣清素自立要爾不推侍臣出後帝
謂彭城王勰曰弁人身自不惡乃復欲以門戶
自矜殊為可怪長子維字伯緒襲父爵為給事

中坐諂事高肇出為益州龍驤府長史辭疾不
行太尉清河王懌輔政以維名臣子薦為通直
郎辟其弟紀行參軍靈太后臨政委任元又恃
寵僞盈懌每以公理裁斷又甚忿恨思害懌遂
與維作計以富貴許之維見又寵勢日隆乃告
司染都尉韓文殊父子謀逆立懌懌被錄禁中
文殊父子懼而逃遁鞠無反狀以文殊亡走懸
處大辟置懌於宮西別館禁兵守之維應反坐
又言於太后欲開將來告者之路乃黜為燕州

昌平郡守紀爲秦州大羌令維及紀頗涉經史而浮薄無行懌尊親懿望朝野瞻屬維受懌春賞而無狀構間天下士人莫不怪忿而賤薄之及又殺懌專斷朝政以維兄弟前者告懌徵維爲散騎侍郎紀爲太學博士領侍御史又甚昵之維超遷通直常侍又除洛州刺史紀超遷尚書郎紀字仲烈初弁謂族弟世景言維踈險而紀識慧不足終必敗吾業世景以爲不爾至是果然聞者以爲知子莫若父尚書令李崇左僕

射郭祚右僕射游肇每云伯緒凶踈終敗宋氏幸得殺身耳論者以爲有徵後除營州刺史靈太后反政以又黨除名遂還鄉里尋追其前誣告清河王事於鄴賜死子春卿早亡弟紀以次子欽仁嗣欽仁武定末爲太尉祭酒紀明帝末爲北道行臺卒晉陽子欽道

欽道仕齊歷位中山太守長於撫接然好察細事其州府佐吏使人間者先酬錢然後敢食臨莅處稱爲嚴整尋徵爲黃門侍郎又令在東宮

教太子吏事時鄭子默以文學見知亦被親寵
欽道本文法吏不甚諳識古今凡有疑事必詢
子默二人幸於兩宮雖諸王貴臣莫敢不敬憚
欽道又遷秘書監仍帶黃門侍郎乾明初遷侍
中與楊愔同誅贈吏部尚書趙州刺史并族弟
穎字文賢位魏郡太守納貨劉騰騰言之以爲
涼州刺史穎前妻劉氏亡後十五年穎夢見之
拜曰新婦今被處分爲高崇妻故來辭君泫然
涕流穎旦見崇言之崇後數日而卒穎族弟鴻

貴爲定州北平府參軍送戍兵於荊州坐取兵
絹四百匹兵欲告之乃斬兵十人又疏凡不達
見律令有梟首罪乃生斷兵手以水澆之然後
斬決尋坐伏法時人哀兵之苦笑鴻貴之愚并
族弟翻

翻字飛鳥少有操行世人以剛斷許之孝莊時
除司徒左長史河南尹初翻爲河陰令順陽公
主家奴爲劫攝而不送翻將兵圍主宅執主婿
馮穆步驅向縣時正炎暑立之日中流汗霑地

縣舊有大枷時人號曰彌尾青及翻為縣主吏請焚之翻曰置南墻下以待豪右未幾有內監楊小駒詣縣請事辭色不遜翻命取尾青以鎖之小駒既免入訴於宣武宣武大怒敕河南尹推之翻具自陳狀詔曰卿故違朝法豈不欲作威以買名翻對曰造者非臣買名者亦宜非臣所以留者非敢施於百姓欲待凶暴之徒如駒者耳於是威振京師及為洛陽迄於河南尹畏憚權勢更相承接故當世之名大致減損卒官

贈侍中衛將軍相州刺史孝武初重贈驃騎大將軍儀同三司尚書左僕射雍州刺史謚曰貞烈翻弟毓字道和敦篤有志行卒於太中大夫子世良

世良字元友年十五便有膽氣後隨伯父翻在南兖州屢有戰功行臺臨淮王彧與語奇之魏朝以彧朱榮有不臣跡帝將圖之密令彧將兵赴洛彧在梁郡稱疾假世良都督令還南兖發兵以聽期世良請簡見兵三千騎五日必到洛

陽并陳三策或皆不能從尋為殿中侍御史詣河北括戶大獲浮惰還見汲郡城旁多骸骨移書州郡悉令收瘞其夜甘雨滂沱河內大守田估賦貨百萬世良檢按之未竟遇赦而還孝莊勞之曰知卿所括得丁倍於本帳若官人皆如此用心便是更出一天下也其後遷殿中世良奏殿中主齊會之事請改付餘曹帝曰卿意不欲親庖厨邪宜付右兵以為永式河州刺史梁景叡抱罕羌首恃遠不敬其賀正使人頻年稱

疾素州刺史侯莫陳悅受其贈遺常為送表世良泣奏科其罪帝喜之謂長孫永業曰宋郎中實有家風甚可重也後拜清河太守世良才識閑明尤善政術在郡未幾聲問甚高陽平郡移掩劫盜三十餘人世良訊其情狀唯送十二人餘皆放之陽平太守魏明朗大怒云輒放吾賊及推問送者皆實放者皆非明朗大服郡東南有曲堤成公一姓阻而居之羣盜多萃於此人為之語曰寧度東吳會稽不歷成公曲堤世良

施八條之制盜奔他境人又謠曰曲堤雖險賊
何益但有宋公自屏跡齊天保初大赦郡無一
囚率羣吏拜詔而已獄內穠生桃樹蓬蒿亦滿
每日牙門虛寂無復訴訟者謂之神門其冬醴
泉出於界內及代至傾城祖道有老人丁金剛
者泣而前謝曰老人年九十記三十五政府君
非唯善政清亦徹底今失賢者人何以濟莫不
攀轅涕泣後卒於東郡太守贈信州刺史世良
強學好屬文撰字略五篇宋氏別錄十卷子伯

宗位侍御史性清退好學多所撰述至齊亡不
徙職遂不入仕隋大業初卒於家世良弟世軌
世軌幼自脩整好法律天保初歷三尚書三公
二千石都官郎中兼并州長史執獄寬平多所
全濟為都官郎中有囚事枉將送垂致法世軌
遣騎追止之切奏其狀遂免稍遷廷尉少卿洛
州人聚結欲劫河橋吏捕案之連諸元徒黨千
七百人崔昂為廷尉以為反數年不斷及世軌
為少卿判其事為劫唯殺魁首餘從坐悉舍焉

大理正蘇珍之以平幹知名寺中語曰決定嫌疑蘇珍之視表見裏宋世軌時人以為寺中二絕南臺囚到廷尉世軌多雪之仍移攝御史將問其濫狀中尉畢義雲不送移往復不止世軌遂上書極言義雲酷擅文宣引見二人親勅世軌曰我知臺欺寺久卿能執理抗衡但守此心勿慮不富貴敕義雲曰卿比所為誠合死以志在疾惡故且一恕仍顧謂朝臣曰此二人竝我骨鯁臣也及卒廷尉御史諸繫囚皆哭曰宋廷

尉死我等豈有生路贈光州刺史謚曰平無子世良以第五子朝基嗣翻弟世景世景少自脩立事親以孝聞與弟道璵下帷讀誦博覽群言尤精經義族兄弁甚重之舉秀才上第再遷彭城王勰開府法曹行參軍勰愛其才學雅相器敬孝文甚嘉異之遷司徒法曹行參軍世景明刑理著律令裁決疑獄剖判如流轉尚書祠部郎彭城王勰每稱曰宋世景精微尚書僕射才也臺中疑事右僕射游肇常以委

之世景既才長從政加之夙勤不怠兼領數曹
深著稱績左僕射源懷引為行臺郎巡察州鎮
十有餘所黜陟賞罰莫不咸允遷七鎮別置諸
戍明設亭候以備不虞懷大相委重還薦之宣
武以為不減李冲帝曰朕亦聞之後為伏波將
軍行滎陽太守鄭氏豪橫號為難制濟州刺史
鄭尚弟遠慶先為苑陵令多所受納百姓患之
而世景下車召而誡之遠慶行意自若世景繩
之以法遠慶懼棄官亡走於是屬縣畏威莫不

改肅終日坐於聽事未嘗寢息人間之事巨細
必知發姦擿伏有若神明嘗有一吏休滿還郡
食人鷄豚又有一幹受人一帽又食二鷄世景
叱而告之吏幹叩頭伏罪於是上下震悚莫敢
犯禁坐弟道瓊事除名世景友于之性過絕於
人及道瓊死哭之酸感行路歲餘母喪遂不勝
哀而卒世景曾撰晉書竟未得就遺腹子季儒
位太學博士曾至譙宋間為文弔嵇康甚有理
致後夜寢室壞壓而殞時人悼傷惜之道瓊少

而敏俊自太學博士轉京兆王愉法曹行參軍
坐愉反得罪作詩及挽歌詞寄之朋親以見寃
痛道璵又曾贈著作郎張始均詩其末章云子
深懷璧憂余有當門病道璵既不免難始均亦
遇世禍時咸怪之道璵從孫孝王學涉亦好緝
綴文藻形貌綖陋而好臧否人物時論甚疾之
為北平王文學求入文林館不遂因非毀朝士
撰朝士別錄二十卷會周武滅齊改為關東風
俗傳更廣聞見勒成三十卷以上之言多妄謬

篇第冗雜無著述體周大象末預尉迴事誅死
許彥字道謨高陽新城人也祖茂仕慕容氏高
陽太守彥少孤貧好讀書從沙門法叡受易太
武徵令卜筮頻驗遂在左右參與謀議彥質厚
慎密與人言不及內事帝以此益親待之賜爵
武昌公拜相州刺史在州受納多違法度詔書
切讓之然以彥腹心近臣弗之罪也卒謚宣公
子熙襲熙卒子安仁襲安仁卒子元康襲降爵
為侯熙弟宗之歷位殿中尚書定州刺史封穎

川公受勅討丁零既平宗之因循郡縣未取不
節深澤人馬超毀謗宗之宗之怒毆殺超超家
人告狀宗之上超謗訕朝政文成聞之曰此必
宗之懼罪誣超案驗果然遂斬於都市元康弟
護州主簿子恂字伯禮頗有業尚閨門雍睦三
世同居吏部尚書李神儁常稱其家風位司徒
諮議參軍脩起居注拜太中大夫卒贈吏部尚
書冀州刺史恂弟惇恂人也惇字季良清識敏速達於從政位司徒主簿以

明斷見知時人號為入鐵主簿稍遷陽平太守
時遷都於鄴陽平為畿郡軍國責辦賦斂無準
又勳貴屬請朝夕徵求惇竝御之以道咸以無
怨政為天下第一特加賞異圖形於闕詔頒天
下歷魏尹齊梁二州刺史政竝有治聲遷大司
農會王思政入據潁城王師出討惇常督軍無
乏絕引洧水灌城惇之策也遷殿中尚書惇美
鬚下垂至帶省中號長鬣公齊文宣嘗因酒酣
提惇鬚稱美以刀截之唯留一握惇懼因不復

敢長人又號齊鬚公歷御史中丞膠州刺史司
農大理二卿再為度支尚書太子少保少師光
祿大夫開府儀同三司尚書右僕射特進賜爵
萬年縣子食邑下邳郡幹惇年老致仕於家三
年卒惇少純直晚更浮動齊朝體式本州大中
正以京官為之乾明中邢邵為中書監德望甚
高惇與邵競中正遂憑附宋欽道出邵為刺史
朝議甚鄙薄之雖久處朝行歷官清顯與邢邵
魏收陽休之崔劼徐之才比肩同列諸人或談

說經史或吟詠詩賦更相嘲戲欣笑滿堂惇不
好劇談又無學術或坐杜口或隱几而睡不為
勝流所重子文紀武平末度支郎中文紀弟文
經勤學方雅身無擇行口無戲言武平末殿中
侍御史隋開皇初侍御史兼通直散騎常侍聘
陳使副主爵侍郎卒於相州長史惇兄遜字仲
讓有幹局乾明中平原太守卒贈信州刺史遜
子文高司徒掾一子文高二子文高三
刁靡字淑和勃海饒安人也曾祖協從晉元帝

度江居京口位尚書令父暢晉右衛將軍初晉相劉裕微時負社錢一萬違時不還暢兄達執而徵焉及誅桓玄以嫌先誅刁氏靡與暢故吏遂奔姚興為太子中庶子及姚泓滅與司馬休之等歸魏請於南境自効明元假靡建威將軍靡遂於河濟間招集流散傳檄邊境靡弟彌時亦率衆入京口親共討裕裕頻遣兵破之明元南幸鄴靡朝於行宮明元問曰縛劉裕者於卿親疎靡曰伯父帝笑曰劉裕父子當應憚卿於

是假靡鎮東將軍青州刺史東光侯使別立義軍又詔靡令隨機立効靡於是招集譙梁彭沛人五千餘家置二十七營遷鎮濟陰遷徐州刺史賜爵東安伯後除薄骨律鎮將靡以西土乏雨表求鑿渠溉公私田又奉詔以高平安定統萬及薄骨律等四鎮出車牛五千乘運屯穀五十萬斛付沃野以供軍糧道多深沙車牛艱阻求於牽屯山河水之次造船水運又以所綰邊表常懼不虞造城儲穀置兵備守詔皆從之詔

即名此城為丕公城以旌功焉皇興中龐與隴西王源賀及中書監高允等竝以耆年特見優禮錫龐几杖劔履上殿月致珍羞焉龐性寬柔好尚文典手不釋書明敏多智凡所為詩賦論頌并諸雜文百有餘篇又汎施愛士恬靜寡欲篤信佛道著教誡二十餘篇以訓子孫太和八年卒年九十五謚曰簡子遵

遵字奉國襲爵遵少不拘小節長更脩改太和中例降為侯嘗經篤疾幾死見有神明救之言

福門子當享長年後卒於洛州刺史謚曰惠侯子楷早卒楷子沖

沖字文朗十三而孤孝慕過人其祖母司空高允女聰明婦人也哀其早孤撫養尤篤沖免喪後便志學他方高氏泣涕留之沖終不止雖家世貴達及從師於外自同諸生于時學制諸生悉日直監厨沖雖有僕隸不令代己身自炊爨每師受之際發志專精不捨晝夜殆忘寒暑學通諸經徧脩鄭說陰陽圖緯筭數天文風氣之

書莫不閑綜當世服其精博刺史郭祚聞其盛
名訪以疑義冲應機解辯無不祛其久惑後太
守范陽盧尚之刺史河東裴桓竝徵冲為功曹
主簿非所好也受署而已不閑事務唯以講學
為心四方學徒就其受業者歲有數百冲雖儒
生而執心壯烈不畏強禦延昌中帝舅司徒高
肇擅恣威權冲乃抗表極言其事辭旨懇直文
義忠憤太傅清河王懌覽而歎息先是冲曾祖
廡作行孝論以誠子孫稱古之葬者衣之以薪

不封不樹後世聖人易之以棺槨至秦以後生
則不能致養死則厚葬過度及於末世至蓬蔞
裹尸裸而葬者確而為論竝非折衷既知二者
之失豈宜同之當今所存者棺厚不過三寸高
不過三尺弗用繒綵歛以時服輜車止用白布
為幔不加畫飾名為清素車又去挽歌方相并
明器雜物及冲祖遵將卒敕其子孫令奉廡遺
旨河南尹丞張普惠謂為太儉貽書於冲叔整
令與通學議之冲乃致書國學諸儒以論其事

學官竟不能答神麈末冲以嫡傳祖爵東安侯
京兆王繼為司空也並以高選頻辟記室參軍
明帝將親釋奠於是國子助教韓神固與諸儒
詣國子祭酒崔光吏部尚書甄琛舉其才學奏
而徵焉及卒國子博士高涼及范陽盧道休盧
景裕等復上狀陳冲業行議奏謚曰安憲先生
祭以太牢子欽字志儒早亡楷弟整字景智少
有大度頗涉書史太和十五年為奉朝請孝文
都洛親自臨選除司空法曹參軍累遷黃門郎

晉泰初假征東大將軍滄冀瀛三州刺史大都
督尋加車騎將軍右光祿大夫遂逢本鄉賊亂
奉母客於齊州既而母卒母即高允之女崔光
崔亮皆經允接待是以涼燠之際光等每致拜
焉天平四年卒於鄴贈司空公謚曰文獻整解
音律輕財好施交結名勝聲酒自娛然貪而好
色為議者所貶子柔又為齊朝令親蕭若心為
柔字子温少好學留心儀禮性強記至於氏族
內外皆所諳悉居母喪以孝聞初為魏宣武挽

郎解中司空行參軍齊天保初累遷國子博士
中書令魏收撰魏史啓柔等同其事柔性專固
自是所聞收常嫌憚又參議律令時議者以為
五等爵邑承襲無嫡子立嫡孫無嫡孫立嫡子
弟無嫡子弟立嫡孫弟柔以為無嫡孫應立嫡
曾孫不應立嫡子弟議曰案禮立嫡以長故謂
長子為嫡子嫡子死以嫡子之子為嫡孫死則
曾玄亦然然則嫡子之名本為傳重故喪服曰
庶子不為長子三年不繼祖與禰也禮公儀仲

子之喪檀弓曰我未之前聞也仲子舍其孫而
立其子何也子服伯子曰仲子亦猶行古之道
也昔者文王舍伯邑考而立武王發微子舍其
孫脂而立其弟衍鄭注曰仲子為親者諱耳立
子非也文王之立武王權也微子嫡子死立弟
衍殷禮也子游問諸孔子孔子曰不立孫注商
以嫡子死立嫡子之母弟周以嫡子死立嫡子
之子為嫡孫故春秋公羊之義嫡子有孫而死
質家親親先立弟文家尊尊先立孫喪服云為

父後者為出母無服小記云祖父卒而後為祖母後者三年為母無服喪者不祭故也為祖母三年者太宗傳重故也今議以嫡孫死而立嫡子母弟嫡子母弟者則為父後矣嫡子母弟本非承嫡以無嫡故得為父後則嫡孫之弟理亦應得為父後則是父卒然後為祖後者服斬既得為祖服斬而不得為傳重未之聞也若用商家親親之義本不應舍嫡子而立嫡孫若從周家尊尊之文豈宜舍其孫而立其弟或文或質

愚用惑焉小記云嫡婦為舅姑後者則舅姑為之小功注云謂夫有廢疾他故若死無子不受重者小功庶婦之服凡父母於子舅姑於婦將不傳重於嫡及將所傳重者非嫡服之皆如衆子庶婦也言死無子者謂絕世無子非謂無嫡子如其子焉得云無後夫雖廢疾無子婦猶以嫡為名嫡名既在而欲廢其子者如禮何有損益革代相沿必謂宗嫡可得而變者則為後服斬亦宜有因而改七年卒柔在史館未久勒成

之際志在偏黨魏書中與其內外通親者並虐
美過實為時論所譏整弟宣字季達以功封高
城縣侯歷位都官尚書衛大將軍滄州刺史卒
贈太尉公謚曰武刁氏世有榮貴而門風不甚
脩潔為時所鄙雍族孫雙字子山高祖藪晉齊
郡太守藪因晉亂居青州之安樂至雙始歸本
鄉雙少好學兼涉文史雅為中山王英所知賞
位西河太守為政清簡吏人安悅及中山王熙
起兵誅元义事敗熙弟略投命於雙雙藏護周

年時購略甚切略懼求送出境雙曰會有一死
所難遇耳今遭知己視死如歸願不以為慮略
復苦求南轉雙乃遣從子昌送達江左靈太后
反政知略因雙獲濟徵拜光祿大夫時略姊饒
安主刁宣妻也頻訴靈太后乞徵略還朝廷乃
以徐州所獲俘江革祖暉二人易之以雙與略
有舊乃令至境迎接明帝末除西兗州刺史時
賊盜蜂起州人張桃弓等招聚亡命公行劫掠
雙至境先遣使諭桃弓陳示禍福桃弓即隨使

歸罪雙捨而不問後有盜發之處令挑弓追捕咸悉禽獲於是州境清肅孝莊初行濟州刺史以功封曲城鄉男孝武初遷驍騎大將軍左光祿大夫興和三年卒贈車騎大將軍儀同三司齊州刺史謚曰清穆

辛紹先隴西狄道人也五世祖怡晉幽州刺史父深仕西涼為驍騎將軍及涼後主歆與沮渠蒙遜戰於蓼泉軍敗失馬深以所乘授歆而身死於難以義烈見稱西土涼州平紹先內徙家

於晉陽明敏有識量與廣平游明根范陽盧度世同郡李承昭等甚相友有至性丁父憂三年口不甘味頭不櫛沐髮遂落盡故常著垂裙皂帽自中書博士轉神部令皇興中薛安都以彭城歸魏時朝廷欲綏安初附以紹先為下邳太守為政不甚嚴察舉其大綱而已唯教人為產禦賊之備及宋將陳顯達蕭道成蕭順之來寇道成謂順之曰辛紹先未易侵也宜共慎之於是不歷郡境徑屯呂梁卒於郡贈并州刺史晉

陽侯謚曰惠子鳳達耽道樂古有長者之名卒於京兆王子推國常侍鳳達子祥字萬福舉司州秀才再遷司空主簿咸陽王禧妃即祥妻之妹也及禧構逆親知多罹塵謗祥獨蕭然不預轉并州平北府司馬有白壁還兵藥道顯被誣為賊官屬咸疑之祥曰道顯面有悲色察獄以色其此之謂乎苦執申之月餘別獲真賊後除郢州龍驤府長史帶義陽太守白早生之反也梁遣來援因此緣淮鎮戍相繼降沒唯祥堅城

固守梁又遣將胡武城陶平虜於州南金山之上連營侵逼祥出其不意襲之賊大崩禽平虜斬武城以送京師州境獲全論功方有賞授而刺史婁悅恥勲出其下間之執政事竟不行胡賊劉龍駒作逆華州除祥安定王燮征虜府長史仍為別將與討胡使薛和滅之卒贈南青州刺史祥弟少雍字季和少聰穎有孝行尤為祖父紹先所愛紹先性嗜羊肝常呼少雍共食及紹先卒少雍終身不食肝性仁厚有禮義門內

之法為時所重稍遷司空高陽王雍田曹參軍少雍清正不憚強禦積年久訟造次決之請託路絕時稱堅明正始中詔百官各舉所知高陽王雍及吏部郎中李憲俱以少雍為舉首卒於給事中少雍妻王氏有德義少雍與從弟懷仁兄弟同居懷仁等事之甚謹閨門禮讓入無間馬士大夫以此稱美子元桓武定中儀同府司馬元桓弟士遜太師開府功曹參軍鳳達弟穆字叔宗舉茂才東雍州別駕初隨父在下邳與

彭城陳敬文友善敬文弟敬武少為沙門從師遠學經久不返敬文病臨卒以雜綾二十四匹託穆與敬武穆久不得見經二十年始於洛陽見敬武以物還之封題如故世稱廉信歷東荊州司馬轉長史帶義陽太守領戍雅有恤人之志再轉汝陽太守遇水滂人饑上表請輕租賦帝從之遂勅汝陽一郡聽以小絹為調除平原相徵為征虜將軍太中大夫未發卒於郡贈後將軍幽州刺史子子馥字元穎早有學行累遷平

原相父子竝為此郡吏人懷安之元顥入洛子
馥不從莊帝反政封三門縣男天平中除太尉
府司馬白山連接三齊瑕丘數州之界多有賊
盜子馥受使檢覆因辯山谷要害宜立鎮戍之
所又諸州豪右在山鼓鑄姦黨多依之又得密
造兵仗上表請破罷諸冶朝廷善而從之後卒
於清河太守子馥以三傳經同說異遂總為一
部傳注並出校比短長會亡未就
韋閔字友觀京兆杜陵人也世為三輔冠族祖

楷晉長樂清河二郡太守父達慕容垂大長秋
卿閔少有器望遇慕容氏政亂避地薊城太武
初徵拜咸陽太守轉武都太守卒郡子範試守
華山郡賜爵高平男卒範子雋字穎超早有學
少孤事祖母以孝聞性溫和廉讓為州里所稱
太和中襲爵歷位都水使者宣武崩領軍于忠
矯擅威刑雋與左僕射郭祚昏嫁故亦同時遇
害臨終訴枉於尚書元欽欽知而不敢申理雋
歎曰吾一生為善未蒙善報常不為惡今為惡

終悠悠蒼天抱直無訴時人咸怨傷焉熙平元年追贈洛州刺史謚曰貞子子粲不詳中聖子粲字暉茂齊王蕭寶夤為雍州刺史引為府主簿轉錄事參軍及寶夤反子粲與弟子爽執志不從相率逃免雍州平賜爵長安子普泰中累遷中書侍郎孝武帝入關子粲歷行臺左丞南汾州刺史少弟道諧為鎮城都督元象中齊神武命將出討子粲及道諧俱被獲送於晉陽子粲累遷南兗州刺史齊天保初封西華縣男

後卒於豫州刺史謚曰忠子粲兄弟十三人竝有孝行居父喪毀瘠過禮既葬廬於墓側負土成墳弟榮亮最知名榮亮字子昱博學有文才德行仁孝為時所重歷諫議大夫衛大將軍卒贈河州刺史子綱字世紀有操行才學見稱領袖本州調為中正開皇中位趙州長史有子文宗文英竝知名閭從叔道福父罷為符堅丞相王猛所器重以女妻焉仕堅為東海太守堅滅奔江左仕宋為秦州刺史道福有志略仕宋位

盱眙南沛二郡太守領鎮北府錄事參軍與徐州刺史薛安都謀擁州內附賜爵高密侯因家彭城卒贈兗州刺史謚曰簡子欣宗以歸國勲別賜爵杜縣侯歷位太中大夫行幽州事卒贈南兗州刺史謚曰簡閔從子崇字洪基父肅字道壽隨劉義真度江位豫州刺史崇年十歲父卒母鄭氏攜以入魏因寓居河洛少為舅兗州刺史鄭羲所器賞位司徒從事中郎孝文納其女為充華嬪除南潁川太守不好發擿細事恒

云何用小察以傷大道吏人感之郡中大安帝聞而嘉賞賜帛二百匹遷洛以崇為司州中正尋除咸陽王禧開府從事中郎復為河南邑中正崇頻居衡品以平直見稱出為鄉郡太守更滿應代吏人詣闕乞留復延三年後卒子猷之釋褐奉朝請轉給事中步兵校尉稍遷前後將軍太中大夫卒猷之弟休之貞和自守未嘗言行忤物歷位給事中河南邑中正安西將軍光祿大夫卒子道建道儒閭族弟珍字靈智孝文

賜名焉父子尚字文叔位樂安王良安西府從事中郎卒贈雍州刺史珍少有志操歷位尚書南部郎孝文初蠻首桓誕歸款朝廷思安邊之略以誕為東荊州刺史令珍為使與誕招慰蠻左珍至桐栢山窮淮源宣揚恩澤莫不懷附淮源舊有祠堂蠻俚恒用人祭之珍乃曉告曰天地明靈即人之父母豈有父母甘子肉味自今宜悉以酒脯代用羣蠻從約自此而改凡所招降七萬餘戶置郡縣而還以奉使稱旨賜爵霸

城子後以軍功進爵為侯累遷顯武將軍鄧州刺史所在有聲績朝廷嘉之遷龍驤將軍賜驛騮二匹帛五十匹穀三百斛珍乃召集州內孤貧者謂曰天子謂我能撫綏卿等故賜以穀帛吾何敢獨當遂以所賜悉分與之尋轉荊州刺史與尚書盧陽烏征赭陽為齊將垣歷生蔡道恭所敗免歸鄉里臨別謂陽烏曰主上聖明志吞吳會用兵機要在於上流若有事荆楚恐老夫復不得停耳後車駕征鄧沔復起珍為中軍

大將軍彭城王勰長史鄧沔旣平試守魯陽郡
孝文復南伐路經珍郡加中壘將軍正太守珍
從至清水帝曰朕頃戎車再駕卿恒翼務中軍
今日之舉亦欲引卿同行但三鷄驗要非卿無
以守也因赦還及孝文崩於行宮祕匿而還至
珍郡始發大諱還除中散大夫尋加鎮遠將軍
太尉諮議參軍卒贈本將軍青州刺史謚曰懿
長子纘字遵彥年十三補中書學生聰敏明辯
為博士李彪所稱再遷侍御中散孝文每與德

學沙門談論往復纘掌綴錄無所遺漏頗見知
賞累遷長兼尚書左丞壽春內附尚書令王肅
出鎮揚州請纘行為州長史加平遠將軍帶梁
郡太守肅薨敕纘行州事任城王澄代肅為州
復啓纘為長史澄出征之後梁將姜慶真乘虛
攻襲遂據外郭雖尋克復纘坐免官卒纘弟彧
字遵慶亦有學識解褐奉朝請稍遷平遠將軍
東豫州刺史綏懷蠻左頗得其心蠻酋田益宗
子魯生魯賢先叛父南入數為寇掠自彧至州

魯生等咸戕啓修敬不復為害或以蠻俗不識
禮儀乃立太學選諸郡生徒於州總教又於城
北置崇武館以習武焉州境清肅罷還遇大將
軍京兆王繼西征請為長史尋以本官兼尚書
為幽夏行臺以功封陰盤縣男卒贈撫軍將軍
雍州刺史謚曰文子彪襲孝莊末為藍田太守
因仕關西彪弟融以軍功賜爵長安伯稍遷大
司馬開府司馬融娶司農卿趙郡李瑾女疑其
妻與章武王景哲姦通乃刺殺之懼亦自殺弟

肱字遵顯少有志業年十八辟州主簿時屬歲
儉肱以家粟造粥以飼飢人所活甚衆解褐太
學博士稍遷右軍將軍為荆郢和糶大使南郢
州刺史田夷啓稱肱父珍往任荊州恩洽夷夏
乞肱充南道別將領荊州驍勇共為腹背詔從
之未幾行南荊州事遷東徐州刺史梁遣其郢
州刺史田麤愷率衆來寇肱於石羊岡破斬之
以功封杜縣子卒於侍中雍州刺史謚曰宣長
子鴻字道衍頗有幹用累遷中書舍人天平三

年坐漏泄賜死於家

杜銓字士衡京兆人晉征南將軍預五世孫也
祖胄符堅太尉長史父嶷慕容垂祕書監仍僑
居趙郡銓學涉有長者風與盧玄高允等同被
徵為中書博士初密太后父豹喪在濮陽太武
欲令迎葬於鄴謂司徒崔浩曰天下諸杜何處
望高朕今方改葬外祖意欲取杜中長老一人
以為宗正令營護凶事浩曰京兆為美中書博
士杜銓其家今在趙郡是杜預後於今為諸杜

最密召見銓器貌瑰雅太武感悅謂浩曰此真
吾所欲也以為宗正令與杜超子道生送豹喪
柩致葬鄴南銓遂與超如親超謂銓曰既是宗
近何緣僑居趙郡乃延引同屬魏郡再遷中書
侍郎賜爵新豐侯卒贈相州刺史魏縣侯謚曰
宣子振字季元舉秀才卒於中書博士振子遇
字慶期位尚書起部郎竊官材瓦起立私宅清
論鄙之卒於河東太守贈都官尚書豫州刺史
謚曰惠銓族孫景字宣明學通經史州府交辟

不就景子裕字慶延雖官非貴仕而文學相傳
仕齊位止樂陵令齊亡退居教授終於家子正
玄字知禮少傳家業耽志經史隋開皇十五年
舉秀才試策高第曹司以策過左僕射楊素怒
曰周孔更生尚不得為秀才刺史何忽妄舉此
人可附下考乃以策抵地不視時海內唯正玄
一人應秀才餘常貢者隨例銓注訖正玄獨不
得進止曹司以選期將盡重以啓素素志在試
退正玄乃手題使擬司馬相如上林賦王褒聖

主得賢臣頌班固燕然山銘張載劔閣銘白鸚
鵡賦曰我不能為君住宿可至未時令就正玄
及時竝了素讀數徧大驚曰誠好秀才命曹司
錄奏屬吏部選期已過注色令還期年重集素
謂曹司曰秀才杜正玄至又試官人有竒器闕
竝立成文不加點素大嗟之命吏部優叙曹司
以擬長寧王記室參軍時素情背曹官及見曰
小王不盡其才也晉王廣方鎮揚州妙選府寮
乃以正玄為晉王府參軍後豫章王鎮揚州又

為豫章王記室卒。正玄弟正藏字為善，亦好學，善屬文。開皇十六年舉秀才。時蘇威監選，試擬賈誼過秦論及尚書湯誓，匠人箴連理樹賦，凡賦弓銘，應時竝就。又無點竄，時射策甲第者，合奏曹司難為為，奏抑為乙科。正藏訴屈，威怒改為景第，授純州行參軍，遷梁郡下邑縣。正大業中，與劉炫同以學業該通，應詔被舉。時正藏弟正儀貢充進士，正倫為秀才，兄弟三人同時應命。當世嗟美之。著作郎王劭奏追脩史司，穀大

夫薛道衡奏擬從事，竝以見任。且放還九年，從駕征遼，為夫餘道行軍長史。還至涿郡，卒。正藏為文迅速，有如宿構。曾令數人竝執紙筆，各題一文。正藏口授，俱成。皆有文理，為當時所異。又為文軌二十卷，論為文體，則甚有條貫。後生寶而行之，多資以解褐。大行於世，謂之杜家新書。云身具李林甫家風，故難卜。並煩報李身，果成。論曰：宋隱操行貞白，遺略榮名，宣情竝保，退素咸見。徵辟可謂德門者矣。義和以才度見知迹。

參顧命拔萃出類當有以哉無子之歎豈徒羊
舌宗祀不亡蓋其幸也翻剛鯁自立猛而斷務
世良昆季雅有家風道謨卜筮取達季良累於
學淺刁靡才識恢遠著聲立事禮遇優隆世有
人爵堂構之義也辛韋不殞門風杜銓所在為
重正玄難兄難弟信為美哉

列傳第十四

北史二十六

列傳第十五

北史二十七

屈遵

張蒲

谷渾

曾孫楷

公孫表

張濟

李先

賈彝

竇瑾

李訢

韓延之

袁式

毛脩之

嚴稜
朱脩之

唐和

寇讚

孫儁

酈範

子道元

韓秀

堯暄

孫雄

柳崇

屈遵字子度昌黎徒河人也博學多才藝慕容垂以為博陸令道武南伐博陵太守申永南奔河外高陽太守崔宏東走海濱屬城長吏率多逃竄遵獨歸道武道武素聞其名拜中書令中原既平賜爵下蔡子卒子須襲爵除長樂太守進爵信都侯卒贈昌黎公謚曰恭須長子恒字長生沈粹有局量歷位尚書右僕射加侍中以破平涼功賜爵濟北公太武委以大政車駕出

征常居中留鎮與襄城公盧魯元俱賜甲第真
君四年墜馬卒時帝幸陰山景穆遣使乘傳奏
狀帝甚悼惜之謂使人曰汝等殺朕良臣何用
乘馬遂令步歸贈征西大將軍謚曰成公子道
賜襲爵道賜善騎射機辯有辭氣太武甚器之
位尚書右僕射加侍中卒謚曰哀公子拔襲爵
帝追思其父祖年十四以為南部大人時太武
南伐禽守將胡盛之以付拔酒醉不覺盛之逃
太武令斬之將伏鎖帝愴然曰若鬼有知長生

問其子孫朕將何以應乃赦拔後獻文以其功
臣子拜營州刺史

張蒲字玄則河內脩武人也本名謨父攀仕慕
容垂位兵部尚書以清方稱蒲少有父風仕慕
容寶為尚書左丞道武定中山寶官司叙用多
降品秩帝既素聞蒲名仍拜尚書左丞明元即
位為內都大官賜爵泰昌子參決庶獄私謁不
行後改為壽張子太武即位以蒲清貧妻子衣
食不給乃以為相州刺史扶弱抑彊進善黜惡

風化大行卒於官吏人痛惜之蒲在謀臣之列
屢出為將朝廷論之常以為稱首贈平東將軍
廣平公謚曰文恭子昭襲以軍功進爵脩武侯
位幽州刺史以善政見稱

谷渾字元沖昌黎人也父袞彎弓三百斤勇冠
一時仕慕容垂位廣武將軍渾少有父風任俠
好氣晚乃折節授經業被服類儒者道武時以
善隸書為內侍左右太武時累遷侍中儀曹尚
書賜爵濮陽公渾正直有操行性不苟合然愛

重舊故不以富貴驕人時人以此稱之在官廉
直為太武所器重以渾子孫年十五以上悉補
中書學生卒謚曰文宣子闡字崇基襲爵位外
都大官卒謚曰簡公子洪字元孫位尚書賜爵
榮陽公性貪奢僕妾衣服錦綺時獻文舅李峻
等初至官給衣服洪輒截沒為有司所糾并窮
其前後贓罪伏法子穎位太府少卿卒贈營州
刺史謚曰貞子士恢字紹達位鴻臚少卿封元
城縣侯太后嬖幸鄭儼懼紹達間構於帝因言

次以紹達為州紹達耽寵不願出太后誣其罪
殺之渾曾孫楷楷有幹局稍遷奉車都尉眇一
目性甚嚴忍前後奉使皆以酷暴為名時人號
曰瞎武累遷城門校尉卒文為本同世世長讓
公孫表字玄元燕郡廣陽人也為慕容沖尚書
郎慕容垂破長子從入中山慕容寶走乃歸為
博士初道武以慕容垂諸子分據勢要權柄推
移遂至亡滅表詣闕上韓非書二十卷道武稱
善明元初賜爵固安子河西飢胡劉武反於上
黨詔表討之為胡所敗帝深銜之太常七年宋
武帝殂時議取河南侵地以奚斤為都督以表
為吳兵將軍廣州刺史表既剋滑臺遂圍武牢
車騎次汲郡始昌子蘇坦太史令王亮奏表置
軍武牢東不得形便之地故令賊不時滅明元
雅好術數又積前忿及攻武牢士卒多傷乃使
人夜就帳中縊殺之以賊未退祕而不宣初表
與勃海封愷友善後為子求愷從女愷不許表
甚銜之及封氏為司馬國璠所逮帝以舊族欲

原之表證其罪乃誅封氏表外和內忌時人以
此薄之表本與王亮同營署及其出也輕侮亮
故及於死第二子軌字元慶明元時為中書郎
出從征討補諸軍司馬太武平赫連昌引諸將
帥入其府藏各令任意取金玉諸將取之盈懷
軌獨不取帝把手親探金賜之謂曰卿臨財廉
朕所以增賜者欲顯廉於衆人後兼大鴻臚持
節拜立氏楊玄為南秦王及境玄不郊迎軌數
玄無蕃臣禮玄懼詣郊受命使還稱旨拜尚書
賜爵燕郡公出為武牢鎮將初太武將北征發
驢以運糧使軌部調雍州軌令驢主皆加絹一
匹乃與受之百姓語曰驢無疆弱輔脊自壯衆
共嗤之坐徵還卒軌既死帝謂崔浩曰吾過上
黨父老皆曰公孫軌為將受貨縱賊使至今餘
姦不除軌之罪也其初來單馬執鞭及去從車
百兩載物而南丁零渠帥乘山罵軌軌怒取罵
軌者之母以矛刺其陰而死之曰何以生此逆
子從下到虜分磔四支於山樹上是忍行不忍

之事軌幸而早死至今在者吾必族誅之軌終
得娶封氏生子叡字叔文位儀曹長賜爵陽平
公時獻文於苑內立殿敕中祕羣官制名叡奏
曰臣聞至尊至貴莫崇於帝王天人挹損莫大
於謙光臣愚以為宜曰崇光奏可卒於南部尚
書謚曰宣叡妻崔浩弟女也生子良字遵伯聰
明好學為尚書左丞為孝文所知遇良弟衡字
道津良推爵讓之仕至司直良以別功賜爵昌
平子子崇基襲軌弟質字元直有經義為中書

學生稍遷博士太武征涼州留宜都王穆壽輔
景穆時蠕蠕乘虛犯塞京師震恐壽雅信任質
為謀主質性好卜筮卜筮者咸云必不來故不
設備由質幾敗國後屢進讜言超遷尚書卒贈
廣陽侯謚曰恭第二子邃字文慶位南部尚書
封襄平伯出為青州刺史以邃在公遺跡可紀
下詔褒述卒官孝文在鄴宮為之舉哀時百度
唯新青州佐吏疑為邃服詔曰專古也理與今
違專今也太乘曩義當斟酌兩途商量得失民

吏之情亦不可苟順也主簿云近代相承服斬
過葬便可如故自餘無服大成寥落可準諸境
內之人為齊衰三月子向始襲爵卒於給事中
邃叡為從父兄弟叡才器小優又封氏之男崔
氏之壻邃母鴈門李氏地望懸隔鉅鹿太守祖
季真多識北方人物每云士大夫當須好婚親
二公孫同堂兄弟耳吉凶會集便有士庶之異
張濟字士度西河人也交千秋慕容永驍騎將
軍永滅來奔道武善之拜建節將軍賜爵成紀
侯濟涉獵書傳清辯善儀容道武愛之與公孫
表等俱為行人拜散騎侍郎襲爵先是晉雍州
刺史楊佺期乞師於常山王遵以禦姚興帝遣
濟為遵從事即報之濟自襄陽還帝問濟江南
事濟曰司馬昌明死子德宗代立君弱臣彊全
無綱紀佺期間臣魏初伐中山幾十萬眾臣答
曰十餘萬佺期曰魏被甲戎馬可有幾匹臣答
中軍精騎十餘萬外軍無數佺期曰以此討羌
豈不滅也又曰魏定中山徙幾戶於北臣答七

萬餘家佮期曰都何城臣答都平城佮期曰有此大衆何用城為又曰魏帝欲為久都平城將移也臣答非所知也佮期間朝廷不都山東貌有喜色曰洛城救援仰恃於魏若獲保全當必厚報如為羌所乘寧使魏取道武嘉其辭厚賞其使許救洛陽後以累使稱旨拜勝兵將軍卒子多羅襲爵坐事除

李先字容仁中山盧奴人少好學善占相術慕容永迎為謀主勸永據長子城仕永位秘書監永滅徙中山皇始初先於井陘歸道武問先曰卿何國人祖父及身悉歷何官先曰臣本趙郡平棘人大父重晉平陽太守大將軍右司馬父懋石季龍樂安太守左中郎將臣苻丕左主客郎慕容永秘書監高密侯車駕還代以先為尚書右中兵郎再遷博士定州大中正帝問先何者最善可以益人神智先曰唯有經書三皇五帝政化之典可以補王者神智又問朕欲集天下書籍如何對曰主之所好集亦不難帝於是

班制天下經籍稍集太武討姚興於柴壁也問
計於先對曰兵以正合戰以奇勝聞姚興欲屯
兵天渡利其糧道及其到前遣奇兵先邀天渡
柴壁左右嚴設伏兵備其表裏興欲進不得住
又乏糧夫高者為敵所棲深者為敵所囚兵法
所忌而興居之可不戰而取帝從其計興果敗
歸明元即位問左右舊臣中誰為先帝所親信
新息公王洛兒曰有李先者為先帝所知俄而
召先讀韓子連珠論二十二篇太公兵法十一

事詔有司曰先所知者皆軍國大事自今常宿
於內賜先絹綵及御馬一匹拜安東將軍壽春
侯賜隸戶二十二卒於內都大官年九十五詔
賜金縷命服一襲贈定州刺史中山公謚曰文
懿子國襲爵國子鳳中書博士鳳子預字元凱
太和初歷祕書令齊郡王友征西大將軍長史
帶馮翊太守府解罷郡遂居長安羨古人殮玉
法乃採訪藍田躬往攻掘得若環璧雜器形者
大小百餘頗有麤黑者亦篋盛以還至而觀之

皆光潤可玩預乃椎七十枚為屑食之餘多惠
人後預及聞者更求玉於故處皆無所見馮翊
公源懷弟得其玉琢為器佩皆鮮明可寶預服
經年云有效驗而世事寢食皆不禁節又加好
酒損志及疾篤謂妻子曰吾酒色不絕自致於
死非藥故也然吾尸體必當有異勿速殯令後
人知殮服之妙時七月中旬長安毒熱預停屍
四宿而體色不變其妻常氏以玉珠二枚含之
口閉常謂曰君自云殮玉有神驗何不受含言

訖齒啓納珠因噓其口都無穢氣舉斂於棺堅
直不傾委死時有遺玉屑數升囊盛納諸棺中
先少子皎天興中密問先曰子孫永為魏臣將
復事他姓邪先曰國家政化長遠不可紀極皎
為寇謙之弟子遂服氣絕粒數十年隱於恒山
年九十餘顏如少童一旦沐浴冠帶家人異之
俄而坐卒道士咸稱其得尸解仙道皎孫義徽
太和中以儒學博通有才華補清河王懌府記
室賡書表疏文不加點清典瞻速當世稱之又

北史列傳卷一
為懌撰輿地圖及顯忠錄性好老莊甚嗤釋教
靈太后臨朝屬有沙門惠憐以呪水飲人云能
愈疾百姓奔湊日以千數義微白懌稱其妖妄
因令義微草奏以諫太后納其言元又惡懌徒
義微都水使者俄而懌被害因棄官隱於大房
山少子蘭以純孝著聞不受辟召孝昌中旌表
門閭正光中文宣王亶嗣位思義微雅正惇篤
薦其孫景儒位至奉車都尉自皇始至齊受禪
百五十歲先之所言有明徵焉景儒子昭微博

涉稽古脫略不羈時人稱其為播郎因以字行
於燕趙焉善談論有宏辯屬文任氣不拘常則
志好隱逸慕葛洪之為人尋師訪道不遠千里
遇高尚則傾蓋如舊見庸識雖王公蔑如初為
道士中年應詔舉為高唐尉太業中將妻子隱
於嵩山號黃冠子有文集十卷為學者所稱
賈彝字彥倫本武威姑臧人也六世祖敷魏幽
州刺史廣川都亭侯子孫因家焉父為苻堅鉅
鹿太守坐訕謗繫獄彝年十歲詣長安訟父獲

申遠近歎之僉曰此子英英賈誼之後莫之與
京弱冠為慕容垂遼西王農記室參軍道武先
聞其名常遣使者求彞於垂垂彌增器敬垂遣
其太子寶來寇大敗於參合執彞及其從兄代
郡太守潤等道武即位拜尚書左丞參預國政
天賜末彞請詣溫陽療疾為叛胡所掠送於姚
興積數年遁歸又為赫連屈丐所執拜祕書監
卒太武平赫連昌子秀迎其尸柩葬於代南秀
位中庶子賜爵陽都男本州大中正獻文即位

進爵陽都子時永相乙渾妻庶姓而求公主之
號屢言於秀秀默然後因公事就第見渾渾夫
妻同坐厲色曰爾管攝職事無所不從我請公
主不應何意秀慷慨大言對曰公主之稱王姬
之號尊寵之極非庶族所宜秀寧就死於今朝
不取笑於後日渾左右莫不失色為之震懼秀
神色自若渾夫妻默然含忿他日乃書太鑿給
事楊惠富臂作老奴官慳字令以示秀渾每欲
伺隙陷之會渾伏誅遂免難時秀與中書令勃

海高允俱以儒舊重於時皆選擬方岳以詢訪
被留各聽長子出為郡秀固讓不受許之自始
及終歷奉三帝雖不至大官常當機要廉清儉
約不營資產年七十三遇疾詔給醫藥賜几杖
時朝廷舉動及大事不決每遣尚書高平公李
敷就第訪決卒贈冀州刺史武邑公謚曰簡子
雋字異隣襲爵位荊州刺史依例降爵為伯先
是上洛置荊州後改為洛州在重山人不知學
雋表置學官在州五載清靖寡事為吏人所安

卒贈兖州刺史子叔休襲爵潤曾孫禎字叔願
學涉經史居喪以孝聞太和中以中書博士副
中書侍郎高聰使江左還以母老患輒在家定
省坐免官後為司徒諮議參軍通直散騎常侍
加冠軍將軍卒贈齊州刺史禎兄子景雋亦以
學識知名為京兆王愉府外兵參軍愉起逆於
冀州將授其官不受死之贈河東太守謚曰貞
景雋弟景輿清峻鯁正為州主簿遂栖遲不仕
後葛榮陷冀州稱疾不拜景輿每捫膝而言曰

吾不負汝以不拜榮也拜景與母陳赫而言曰
竇瑾字道瑜頓丘衛國人自云漢司空融之後
也高祖成頓丘太守因家焉瑾少以文學知名
自中書博士為中書侍郎賜爵繁陽子參軍國
謀屢有功進爵衛國侯轉四部尚書初定三秦
人猶去就拜長安鎮將毗陵公在鎮八年甚著
威惠徵為殿中都官尚書太武親待之賞賜甚
厚從征蓋吳吳平留瑾鎮長安還京復為殿中
都官典左右執法太武歎曰國之良輔毗陵公

之謂矣出為冀州刺史清約沖素著稱當時還
為內都大官興光初瑾女壻鬱林公司馬彌陀
以選尚臨涇公主瑾教彌陀辭託有誅謗呪詛
之言與彌陀同誅唯少子遵逃匿得免遵善楷
篆北京諸碑及臺殿樓觀宮門題署多遵書位
濮陽太守多所受納其子僧演姦通人婦為部
人賈邈告坐免後以善書拜庫部令卒官
李訢字元盛小名真奴范陽人也曾祖產產子
績二世知名於慕容氏父崇馮跋吏部尚書石

城太守車駕至和龍崇率十餘郡歸降太武甚禮之呼曰李公為北幽州刺史固安侯卒謚曰襄侯訢母賤為諸兄所輕崇曰此子之生相者言貴吾每觀或未可知遂使入都為中書學生太武幸中書學見而異之指謂從者曰此小兒終効用於朕之子孫因識晒之帝舅陽平王杜超有女將許貴戚帝曰李訢後必官達益人門戶可以妻之遂勸成婚南人李哲常言訢必當貴達杜超之死也帝親哭三日訢以超女婿得

在喪位出入帝指謂左右曰觀此人舉動豈不異於衆也必為朕家幹事臣訢聰敏機辯彊記明察初李靈為文成博士詔崔浩選中書學生器業優者為助教浩舉其弟子箱子與盧度世李敷三人應之給事高讜子祐尚書段霸兒姪等以為浩阿黨其親戚言於景穆以浩為不平聞之於太武太武意在訢曰云何不取幽州刺史李崇老翁兒浩對曰前亦言訢合選但以其先行在外故不取之帝曰可待訢還箱子等罷

之遂除中書助教博士入授文成經文成即位
訢以舊恩親寵遷儀曹尚書領中祕書賜爵扶
風公贈其母孫氏為容城君帝顧羣臣曰朕始
學之歲情未能專既總萬機溫習靡暇是故儒
道寔有闕焉豈惟予咎抑亦師傅之不勤所以
爵賞仍隆蓋不遺舊也訢免冠拜謝出為相州
刺史為政清簡百姓稱之訢上疏求於州郡各
立學官使士望之流衣冠之胄就而受業其經
藝通明者上王府書奏獻文從之以訢政為諸

州之最加賜衣服自是遂有驕矜自得之志受
納人財物商胡珍寶兵人告言尚書李敷與訢
少長相好每左右之或有勸以奏聞敷不許獻
文聞訢罪狀檻車徵訢拷劾抵罪敷兄弟將見
踈斥有司諷以中旨嫌敷兄弟之意令訢告列
敷等隱罪可得自全訢深所不欲且弗之知也
乃謂其女婿裴攸曰吾與李敷族世雖遠情如
一家在事既有此勸昨來引簪自刺以帶自絞
而不能致絕且亦不知其事攸曰何為為他死

敷兄弟事豐可知有馮闌者先為敷殺其家切恨之但呼闌弟問之足可知委訢從其言又趙郡范櫟具列敷兄弟事狀有司以聞敷坐得罪詔列訢貪冒應死以糾李敷兄弟故免百鞭髡刑配為廝役訢之廢也平壽侯張讜見訢與語竒之謂人曰此佳士也終不久屈未幾而復為太倉尚書攝南部事用范櫟陳策計令千里之外戶別轉運詣倉輸之使所在委滯停延歲月百姓競以貨賂各求在前於是遠近大為困弊

道路羣議曰畜聚斂之人未若盜臣訢弟左軍將軍璞謂訢曰范櫟善能降人以色假人以辭未聞德義之言但有勢利之說聽其言也甘察其行也賊所謂諂諛讒慝貪冒姦佞不早絕之後悔無及訢不從彌信之腹心事皆以告櫟訢既寵於獻文參決軍國大議兼典選舉權傾內外百寮莫不曲節以事之櫟以無功起家舞盧奴令獻文崩訢遷司空進爵范陽公出為侍中鎮南大將軍開府儀同三司徐州刺史范櫟知

文明太后之忿訢又知內外疾之太和元年希
旨告訢外叛文明太后徵訢至京師言其叛狀
訢曰無之引槩證訢訢言爾妄云知我吾又何
言雖然爾不顧余之厚德而忍為此不仁甚矣
槩曰公德於槩何若李敷之德於公公昔忍於
敷槩今敢不忍公乎訢慨然曰吾不用璞言自
貽伊戚萬悔於心何嗟及矣遂見誅璞字季直
性醇厚多識人物賜爵宜陽侯太常卿
韓延之字顯宗南陽堵陽人魏司徒暨之後也

任晉位建威將軍荊州從事轉平西府錄事參
軍晉將劉裕伐司馬休之未至江陵密與延之
書招之延之報書辭甚激厲曰劉裕足下海內
之人誰不見足下此心而復欲欺誑國士其不
屈如此事見南史宋本紀延之以裕父名翹字
顯宗於是已字顯宗名子為翹蓋示不臣劉氏
也後奔姚興秦常二年與司馬文思等俱入魏
明元以延之為武牢鎮將賜爵魯陽侯初延之
曾來往栢谷塢省魯宗之墓有終焉之志因謂

子孫云河洛三代所都朝廷必有居此者我死不勞向北代葬也即可就此子從其言遂葬宗之墓次延之後五十餘年而孝文徙都其孫數家即居於祖墓之北栢谷塢
袁式字季祖陳郡陽夏人漢司徒滂之後父深晉侍中式在南歷武陵王遵諮議參軍及劉裕執權式歸姚興及姚泓滅歸魏為上客賜爵陽夏子與司徒崔浩一面便盡國士之交時朝儀典章悉出於浩浩以式博於故事每所草創恒

顧訪之性長者雖羈旅飄泊而清貧守度不失士節時人甚敬重之皆呼曰袁諮議至延和二年衛大將軍樂安王範為雍州刺史詔式與中書侍郎高允俱為從事中郎辭而獲免式沈靖樂道周覽書傳至於詰訓倉雅偏所留懷作字釋未就以太安二年卒贈豫州刺史謚肅侯子濟襲父爵位魏郡太守政有清稱加寧遠將軍及宋王劉昶開府召為諮議參軍
毛脩之字敬文滎陽陽武人也世仕晉劉裕之

平關中留子義真鎮長安以脩之為司馬及義
真敗脩之沒統萬太武平赫連昌獲之使領吳
兵以功拜吳兵將軍脩之能為南人飲食手自
煎調多所適意太武親待之累遷尚書賜爵南
郡公常在太官主進御膳從討和龍時諸軍攻
城行宮人少宋故將朱脩之為雲中將軍欲率
吳兵為逆因入和龍與浮海南歸以告脩之不
聽乃止是日無脩之大變幾作脩之遂奔馮弘
脩之又以軍功遷特進撫軍大將軍位次崔浩

下浩以其中國舊門雖不博洽猶涉獵書傳與
共論說之次及陳壽三國志志有古良史風其
所著述文義典正班史以來無及壽者脩之曰
昔在蜀中聞長老言壽曾為諸葛亮門下書佐
得捷百下故其論武侯云應變非其所長浩乃
與論曰承祚之評亮乃有故義過美之譽非挾
恨之言夫亮之相備英雄奮發之時君臣相得
魚水為喻而不能與曹氏爭天下委棄荊州退
入巴蜀守窮崎嶇之地僭號邊夷之間此策之

下者可以趙他為偶而以管蕭之亞匹不亦過乎且亮既據蜀弗量勢力嚴威切法控勒蜀人欲以邊夷之衆抗衡上國出兵隴右再攻岐山一攻陳倉踈遲失會摧衄而反後入秦川更求野戰魏人知其意以不戰屈之智窮勢盡發病而死由是言之豈合古之善將見可知難乎脩之謂浩言為然後卒於外都大官謚恭公脩之在南有四子唯子法仁入魏文成初為金部尚書襲爵轉殿中尚書法仁言聲壯大至於軍旅

田狩唱呼處分振於山谷卒贈征東大將軍南郡王謚曰威朱脩之者仕宋為司徒從事中郎守滑臺為安頡所禽太武善其固守以宗室女妻之以為雲中鎮將後奔馮弘弘送之江南頡之剋滑宋陳留太守嚴稜戍倉垣及山陽公奚斤軍至潁川稜率文武五百人詣斤降明元嘉其誠款賜爵郟陽侯假荊州刺史隨駕南討遷為上客及太武踐阼以歸化之功除中山太守有清廉稱卒於家子幼玉襲稜舊書有傳今附

之云脩之在宋顯達事竝具南史書本傳今所
唐和字幼起晉西宜安人也父繇以涼土喪亂
推涼武昭王霸于河右及涼亡和與兄契攜其
甥武昭王孫寶避難伊吾招集人衆二千餘家
臣於蠕蠕蠕蠕以契為伊吾王經二十年和與
契遣使降魏為蠕蠕所逼遂擁部至高昌蠕蠕
遣部帥阿若討和至白力城和先攻高寧契與
阿若戰沒和收餘衆奔前部王國時沮渠安周
屯橫截城和攻拔之斬安周元子樹又剋高寧

白力二城遣使表狀太武嘉之屢賜之璽書後
和與前部王車伊洛破安周太武使周公萬度
歸討焉耆詔和與伊洛率所領赴度歸喻下柳
驢以東六城因共擊波居羅城拔之後同征龜
茲度歸令和鎮焉耆時柳驢戍主乙真伽將叛
和徑入其城禽斬乙真伽由是西域剋平和有
力焉正平元年和詣闕太武優寵之待以為上
客文成以和歸誠先朝封酒泉公太安中為濟
州刺史甚有稱績徵為內都大官評決獄訟不

加捶楚察疑獲實者甚多世以是稱之卒贈征
西大將軍太常卿酒泉王謚曰宣子欽字孟真
位陝州刺史降爵為侯卒子景宣襲爵卒於東
都太守契子玄達性果毅有父風與叔父和歸
闕俱為上客封晉昌公獻文時位華州刺史太
和十六年降為侯子崇字繼祖襲爵封同安
寇讚字奉國上谷人也因難徙馮翊万年父脩
之字延期苻堅東萊太守讚弟謙有道術太武
敬重之故追贈脩之安西將軍秦州刺史馮翊

公賜命服謚曰哀公詔秦雍二州為立碑墓又
贈脩之母為馮翊夫人及宗從追贈太守縣令
侯子男者十六人其臨職者七郡五縣讚少以
清潔知名身長八尺姿容嚴凝非禮不動苻堅
僕射韋華州里高達雖年時有異怕以風味相
待華為馮翊太守召為功曹後除襄邑令姚泓
滅秦雍人千餘家推讚為主歸魏拜河南郡太
守其後秦雍人來奔河南滎陽河內者戶至萬
數拜讚南雍州刺史軹縣侯於洛陽立雍之郡

縣以撫之由是流人襁負自遠而至參倍於前
進讚爵河南公加安南將軍領南蠻校尉仍刺
史分洛豫二州之僑郡以益之雖位高爵重接
待不倦初讚之未貴嘗從相者唐文相文曰君
額上黑子入幘位當至方伯封公及其貴也文
以百姓禮拜謁曰明公憶疇昔言乎延文坐曰
往時卿言杜瓊不得官長人咸謂不然及瓊為
蓋屋令卿猶言相中不見而瓊果以暴疾未拜
而終昔魏舒見主人兒死自知已必至公吾恒

以卿言瓊之驗亦復不息此望也乃賜文衣服
良馬讚在州十七年甚收公私之譽年老求致
仕卒遺令薄葬斂以時服太武悼惜之謚曰宣
穆子元寶襲爵元寶弟臻字仙勝年十二遭父
憂居喪以孝稱輕財好士獻文末為中川太守
時馮熙為洛州刺史政號貪虐仙勝微能附之
甚得其意後為弘農太守坐受納為御史所彈
遂廢卒於家子祖訓順陽太守祖訓弟祖禮兄
弟竝孝友敦穆白首同居父母亡雖久猶於平

生所處堂宇備設幃帳几杖以時節開堂列拜垂涕陳薦若宗廟焉吉凶之事必先啓告遠出行反亦如之祖禮宣武末為河州刺史在任數年遇郤鐵忽反又為城人詣都列其貪狀十六條會赦免久之兼廷尉卿又兼尚書畏避勢家承顏候色不能有所執據後蠻反於三鷗為都督追討戰歿贈衛大將軍七兵尚書雍州刺史昌平男祖禮弟儁

儁字祖儁性寬雅幼有識量好學彊記性又廉

恕不以財利為心家人曾賣物與人而利得絹一匹儁於後知之乃曰得財失行吾所不取訪主還之以選為孝文帝挽郎除奉朝請大乘賊起燕趙擾亂儁參護軍事東討以功授員外散騎侍郎累遷司空府主簿時靈太后臨朝減食祿官十分之一造永寧佛寺令儁典之資費巨萬主吏不能欺隱寺成又極壯麗靈太后嘉之除左軍將軍孝昌中朝議以國用不足乃置監池都將秩比上郡前後居職者多有侵隱乃以

儁為之仍主簿永安初華州人史底與司徒楊椿訟田長史以椿勢貴皆言椿直欲以田給椿儁曰史底窮人楊公橫奪其地若欲損不足以給有餘見使雷同未敢聞命遂以地還史底孝莊帝後知之嘉儁守正不撓拜司馬其附椿者咸責焉二年出為梁州刺史人俗荒獷多為盜賊儁乃令郡縣為立庠序勸其耕桑敦以禮讓數年之中風俗頓革梁遣其將曹琰之鎮魏興繼日板築琰之屢擾疆場邊人患之儁遣長史

杜林道攻克其城并禽琰之琰之即梁大將景宗之季弟也於是梁人懼焉屬魏室多故州又僻遠梁人知無外援遂大兵頓魏興志圖攻取儁撫厲將士人思効命梁人知其得衆心也弗之敢逼儁在州清苦不事產業其子等並徒步而還吏人送儁留連於道久之乃得出界大統三年東魏授儁洛州刺史儁因此乃謀歸闕五年將家及親屬四百口入關拜祕書監時軍國草創墳典散逸儁始選置令史抄集經籍四部

羣書稍得周備加鎮東將軍封安西縣男十七
年加散騎常侍遂稱篤疾不復朝覲恭帝三年
賜姓若口引氏孝閔帝踐阼進爵為子武成元
年進驃騎大將軍開府儀同三司雋年齒雖高
而志識未衰教授子孫必先典禮明帝尚儒重
德特欽賞之數加恩賜思與相見雋不得已乃
入朝帝與同席而坐顧訪洛陽故事雋身長八
尺鬚鬢皓然容止端詳音韻清朗帝與之談論
不覺屢為之前膝及雋辭還帝親執其手曰公

年德俱尊朕所欽尚乞言之事所望於公宜數
相見以慰虛想以御輿令於帝前乘出顧謂左
右曰如此事唯積善者可以致之何止見重於
今亦將傳之萬古時人咸以為榮卒年八十二
武帝歎惜之贈本官加冀定瀛三州諸軍事冀
州刺史謚曰元雋篤於仁義期功之中有孤幼
者衣食豐約竝與之同少為司徒崔光所知光
命其子勵與雋結友雋每造光常清談移日小
宗伯盧辨以雋業行俱崇待以師友之禮每有

閑暇輒詣雋讌語弥日恒謂人曰不見西安君
煩憂不遣其為通人所敬重如此子奉位至儀
同大將軍順陽郡守洵州刺史昌國縣公奉弟
顯少好學最知名居喪哀毀位儀同大將軍掌
朝布憲為典祀下大夫小納言濩澤郡公

酈範字世則范陽涿鹿人也祖紹慕容寶濮陽
太守以郡迎降道武授兗州監軍父嵩天水太
守範太武時給事東宮太武踐阼追錄先朝舊
勳賜爵永寧男以奉禮郎奉遷太武景穆神主

於太廟進爵為子為征南大將軍慕容白曜司
馬及定三齊範多進策曰曜皆用其謀遂表為
青州刺史進爵為侯加冠軍將軍還為尚書右
丞後除平東將軍青州刺史假范陽公範前解
州還京也夜夢陰毛拂踝他日說之時齊人有
占夢者史武進云公豪盛於齊下矣使君臨撫
東秦道光海岱必當重牧全齊再祿營丘矣範
笑荅曰吾將為卿必驗此夢後果如言時鎮將
元伊利表範與外賊交通孝文詔範曰鎮將伊

利表卿造船市玉與外賊交通規陷卿罪窺覷
州任有司推驗虛實自顯有罪者今伏其辜矣
卿其明為筭略勿復懷疑還朝卒京師謚曰穆
子道元史云公素為公存丁史對道元字善長初襲爵永寧侯例降為伯御史中
尉李彪以道元執法清刻自太傅掾引為書侍
御史彪為僕射李冲所奏道元以屬官坐免景
明中為冀州鎮東府長史刺史于勁順皇后父
也西討關中亦不至州道元行事三年為政嚴

酷吏人畏之姦盜逃於他境後試守魯陽郡道
元表立黌序崇勸學教詔曰魯陽本以蠻人不
立大學今可聽之以成良守文翁之化道元在
郡山蠻伏其威名不敢為寇延昌中為東荊州
刺史威猛為政如在冀州蠻人詣闕訟其刻峻
請前刺史寇祖禮及以遣戍兵七十人送道元
還京二人竝坐免官後為河南尹明帝以沃野
懷朔薄骨律武川撫冥柔玄懷荒禦夷諸鎮竝
改為州其郡縣成名令準古城邑詔道元持節

兼黃門侍郎馳駟與大都督李崇壽宜等立裁
減法留會諸鎮叛不果而還孝昌初梁遣將楊
州刺史元法僧又於彭城反叛詔道元持節兼
侍中攝行臺尚書節度諸軍依僕射李平故事
軍至渦陽敗退道元追討多有斬獲後除御史
中尉道元素有嚴猛之稱權豪始頗憚之而不
能有所糾正聲望更損司州牧汝南王悅嬖近
左右丘念常與臥起及選州官多由於念念常
匿悅第時還其家道元密訪知收念付獄悅啓

靈太后請全念身有敕赦之道元遂盡其命因
以劾悅時雍州刺史蕭寶夤反狀稍露侍中城
陽王徽素忌道元因諷朝廷遣為閑右大使寶
夤慮道元圖已遣其行臺郎中郭子帙圍道元
於陰盤驛亭亭在岡上常食岡下之井既被圍
穿井十餘丈不得水水盡力屈賊遂踰墻而入
道元與其弟道闕二子俱被害道元瞋目叱賊
厲聲而死寶夤猶遣斂其父子殯於長安城東
事平喪還贈吏部尚書冀州刺史安定縣男道

元好學歷覽奇書撰注水經四十卷本志十三篇又為七聘及諸文皆行於世然兄弟不能篤睦又多嫌忌時論薄之子孝友襲道元第四弟道慎字善季涉歷史傳有幹局位正平太守有能名遷長樂相卒贈平州刺史道慎弟道約字善禮樸質遲鈍頗愛琴書性多造請好以榮利干謁乞丐不已多為人所笑弄坎壈於世不免飢寒晚歷東萊魯陽二郡太守為政清靜吏民安之範弟道峻子惲字幼和好學有文才尤長

吏幹舉秀才射策高第歷位尚書外兵郎行臺長孫承業引為行臺郎惲頗兼武用恒以功名自許每進計於承業多見納用以功賞魏昌縣子惲在軍啓求減身官爵為父請贈詔授征虜將軍安州刺史惲後與唐州刺史崔元珍固守平陽介朱榮稱兵赴闕惲與元珍不從為榮行臺郎中樊子鵠陷城被害所作文章頗行於世撰慕容氏書不成子懷則司空長流參軍韓秀字白武昌黎人也祖宰慕容儁謁者僕射

父景皇始初歸魏拜宣威將軍騎都尉秀歷位
尚書郎賜爵遂昌子文成稱秀聰敏清辯才任
喉舌遂命出納王言并掌機密行幸遊獵隨侍
左右獻文即位轉給事中參征南慕容白曜軍
事延興中尚書奏以敦煌一鎮介遠西北寇賊
路衝慮或不固欲移就涼州羣臣會議僉以為
然秀獨曰此感國之事非關土之宜愚謂敦煌
之立其來已久雖隣疆寇而兵人素習循常置
戍足以自全若徙就姑臧慮人懷異意或貪留

重遷情不願徙脫引寇內侵深為國患且捨遠
就近遙防有闕一旦廢罷是啓戎心則夷狄交
構互相來往關右荒擾烽警不息邊役煩興艱
難方甚乃從秀議後為平東將軍青州刺史卒
子務襲爵務字道世性端謹有吏幹為定州平
北長史頗有受納為御史中尉李平所劾付廷
尉會赦免後除龍驤將軍郢州刺史務獻七寶
牀象牙席詔曰昔晉武帝焚雉頭裘朕常嘉之
今務所獻亦此之流也奇麗之物有乖風素可

付其家人後以詐表破賊免官久之拜太中大夫進號左將軍卒音左帝焚賊配築趙常壽之堯暄字辟邪上黨長子人也本名鍾葵後賜名暄祖僧賴道武平中山與趙郡呂含首來歸國暄聰了美容貌為千人軍將太武以其恭謹擢為中散後兼北部尚書于時始立三長暄為東道十三州使更比戶籍賜獨車一乘廐馬四匹暄前後從征及出使檢案三十許度皆有剋已奉公之稱賞賜衣服綵絹奴婢等物賜爵平陽

伯及改置百官授太僕卿轉大司農卒於平城孝文為之舉哀贈相州刺史初暄至徐州見州城樓觀嫌其華盛乃令往往毀徹由是後更損落及孝文幸彭城聞之曰暄猶可追斬暄長子洪襲爵洪子傑字永壽元象中開府儀同三司樂城縣公洪弟遵位臨洮太守卒謚曰思遵弟榮位員外散騎侍郎子雄字休武少驍果輕財重氣位燕州刺史平城縣伯隨尔朱兆與齊神武戰敗於廣阿率所部據定州歸神武其從兄

傑為兆滄州刺史亦遣使降神武以其兄弟俱有誠款使傑便為行瀛州事使雄代傑為瀛州刺史進爵為公時禁網踈闊官司相與聚斂唯雄義然後取接下以恩甚為吏人所懷魏孝武帝入關雄為大都督隨高昂破賀拔勝於穰城仍除豫州刺史元洪威據潁川叛叛人趙繼宗殺潁川太守邵招據樂口北應洪威雄討之繼宗敗走城內因雄之出據州引西魏雄復與行臺侯景討平之梁將李洪芝王當伯襲破平鄉

城雄竝禽之又破梁司州刺史陳慶之復圍南荆州東救未至雄陷其城梁以元慶和為魏王侵擾南境雄大破之於南頓尋與行臺侯景破梁楚城豫州人上書更乞雄為刺史復行豫州事潁州長史賀若統執刺史田迅據州降西魏詔雄與廣州刺史趙育揚州刺史是實隨行臺任祥攻之西魏將怡鋒敗祥等育實各還據城降敵雄收散卒保大梁周文帝遣其右丞韋孝寬等攻豫州雄都督程多寶降之執刺史馮邕

并雄家屬及部下妻子數千口欲送長安至樂
口雄外兵參軍王恒伽都督赫連雋等從大梁
邀之斬多寶收雄家口還大梁雄別破樂口會
丞伯進討懸瓠復以雄行豫州事西魏以是寶
為揚州刺史據項城義州刺史韓顯據南頓雄
一日拔其二城禽顯及長史岳寶遁走加驃騎
大將軍儀同三司仍隨侯景平魯陽復除豫州
刺史雄雖武將性管寬厚為政舉其大綱而已
在邊十年屢有功績愛人物多所施與亦以此

稱興和四年卒於鄴贈司徒謚曰武恭子師嗣
柳崇字僧生河東解人也七世祖軌晉廷尉卿
崇方雅有器量身長八尺美鬚明目兼有學行
舉秀才射策高第解褐太尉主簿轉尚書右外
兵郎中于時河東河北二郡爭境其間有鹽池
之饒虞坂之便守宰百姓皆恐外割公私朋競
紛囂臺府孝文乃遣崇檢斷上下息訟屬荆郢
新附南寇窺擾又詔崇持節與州郡經略加慰
喻還遷太子洗馬本郡中正累遷河中太守崇

初屆郡郡人張明失馬疑執十餘人崇見之不問賊事人別借以溫顏更問其親老存不農業多少而微察其辭色即獲真賊呂穆等二人餘皆放遣郡中畏服境內帖然卒於官贈岐州刺史謚曰穆崇所製文章寇亂遺失長子慶和性沈靜不競於時位給事中本郡中正卒慶和弟楷字七則身長八尺善草書頗涉文史位撫軍司馬子曾主河東人少壯時師晉書

論曰屈遵學藝知機恒乃局量受委張蒲谷渾

文武為用人世仍顯不亦善事公孫表初則一介見知終以輕薄致戾軌始受探金之賞末陷財利之嫌鮮克有終固不虛也張濟使於四方有延譽之美李先學術嘉謀荷遇三世賈彝早播時譽秀則不畏疆禦實瑾李訢時曰良幹瑾以片言疑似訢以夙故猜嫌而嬰合門之戮良可悲也韓延之忠於所事有國士之烈袁式取遇崔公以博雅而重脩之晚著誠款唐和萬里慕義寇讚誠信見嘉鄺範智器而達道元遭命

有銜鬚之風韓秀議邊得馭遠之策堯暄聰察
 致位禮加存沒柳崇素業有資器行仍世盛矣
 乎悲也韓英之忠於所事本國士之然素左順
 以執言錄於信以風姑許救而嬰合門之瘡身
 齒排舉亦俱不異靈囑實重李信執曰身傳重
 百族譽之美李夫學術嘉籍尚選三世實經早
 相休之職難求本然固不盡也非漸對於四太
 公良味然以歸冀姪吳煒故受科全之賞末到
 列傳第十五世以賜不北史卷十七集附限一

